

## Kart daa bzej Páblona' na' bse<sub>leen</sub> lao ben'ka' non<sub>lilall</sub>' Jesucrístona' yell Rómána'

<sup>1</sup> Nad' Pablo, nak' wen llin che Cristo Jesúsá'. Chioza' gox w<sub>n</sub>abe' nad' gak' postl che', na' bene' lall' na' wi'a dill' wen dill' kob che'na' <sup>2</sup> cheyi daa b<sub>che</sub>be' gone', na' dii ben'ka' wdix<sub>jee</sub> daa golle' legake' kani'yi bzejgake'n lee Cho'a Xtilleena'. <sup>3-4</sup> Na' cho'en dill' che Xiine' Jesucrístona', beena' nak X<sub>ancho</sub>, daa goke' be<sub>ne</sub>ch, na' goke' xiin dia che dii rey Davina'. Na' Espíritu Sántona' bli'e nan nake' Xiin Chioza', beena' nak ben' yel' wak choo yel' wak xen daa bibane' ladj ben' wetka'. <sup>5</sup> Na' daa non<sub>lilall</sub>'nto' Jesucrístona', Chioza' ba goklene' neto', na' nzoe' neto' naknto' postl che Jesucrístona', na' bene' lall' na'nto' lljtix<sub>je</sub>'nto' xtilleena' kwenche doxen yell-lioni soa ben' gon<sub>lilall</sub>'gake'ne' na' wzenaggake' che', na' sho'e balaan. <sup>6</sup> Na' lenle ba gox w<sub>n</sub>ab Chioza' kwenche gakle lall' na' Jesucrístona'.

<sup>7</sup> Chzej' yog'lol-le, le' lle'le yell Rómána', le' ba gox w<sub>n</sub>ab Chioza' nakle lall' nee na' chakile' le'. X<sub>acho</sub> Chioza' na' X<sub>ancho</sub> Jesucrístona' gaklenshgagake' le' na' wzoagake' le' mbalaz.

<sup>8</sup> Zigaate nia' le', ni cheyi daa ben Jesucrístonan' chak wi'a Chioza' yel' choxken che yog'loltele, la' doxen choe' ben' dill' ba non<sub>lilall</sub>'le Jesucrístona'. <sup>9</sup> Chios, beena' chon' xshine'na' do yichj do lallaa daa chyixji'a dill' wen dill' kob che Xiine'na', nez nle'ile' t<sub>lizi</sub> ch<sub>n</sub>abidee gaklene' le' kat' choe'lwilllee. <sup>10</sup> Na' toshiizi ch<sub>n</sub>abidee wi'e latj yidwia' le', na' shi cheenile' yid', lekze' kwee x<sub>nezin</sub>. <sup>11</sup> Le chzelallaa yidwia' le' na' we'len' le' dill' daa gaklenen le'

soa<sub>ch</sub>ech<sub>ch</sub>le gon<sub>l</sub>ilall'chle Jesucristona'. <sup>12</sup> La' cheenid' wtipch lall' ljwellcho daa non<sub>l</sub>ilall'chone'.

<sup>13</sup> Le' ben' bish' na' le' ben' zan', cheenid' inezile zan shii ba goklallaa yidwia' le' per ax<sub>t</sub> naa bikzan' gakan. Cheenid' yidwia' le' kwen<sub>ch</sub>e gakchachle gon<sub>l</sub>ilall'le Jesucristona' na' soach ben' gon<sub>l</sub>ilall'gake'ne' ladjlena', ka ba gok <sub>ch</sub>e ben'ka' bi nak ben' Israel yellka' gana' ba wyaa.

<sup>14</sup> Ne<sub>z</sub>id' chonan byen we'len' yog' ben' xtill' Crístona', ka ben' griego na' ka ben' bi nak ben' griego, ka ben' sin' na' ka ben' bi nteyi. <sup>15</sup> Daan, cheenid' lekzka' <sub>ch</sub>ixje'id' le' dill' wen dill' kob <sub>ch</sub>e'na', le' zoale Rómana'.

<sup>16</sup> Bi chiyii chido'id' wi'a dill' wen dill' kob <sub>ch</sub>e Jesucristona', la' nsa'n ye<sub>l</sub>' wak <sub>ch</sub>e Chioza' kwen<sub>ch</sub>e yislan nottez ben' gon<sub>l</sub>ilalleene', zigaate ben' Israelka', na' lekzka' ben'ka' bi nak ben' Israel. <sup>17</sup> Na' dill' wen dill' kob <sub>ch</sub>e'na' chliin cho' nakan goncho yiyakcho ben' li ben' shao' lao Chioza'. Na' chzajniin cho' chiya<sub>l</sub>' gon<sub>l</sub>ilall'chone' na' bich bi de sto dii gaklenan cho'. Kon ka na Cho'a Xtilleena': "Beena' nak ben' li ben' shao' daa non<sub>l</sub>ilallee nad', beenan' ibane'."

<sup>18</sup> Ye<sub>l</sub>' zak'zi <sub>ch</sub>e Chioza' za'n yabana' ni <sub>ch</sub>e ben'ka' bi chzenag <sub>ch</sub>e' na' chongake' chiya dii mal, diika' chsej chllongakan gombia'gake' daa nak dii li. <sup>19</sup> Daa cheeni Chioza' inezgakile' <sub>ch</sub>e', ba nez<sub>z</sub>gakile'n, la' Chioza'kzan ba bliile'n legake'. <sup>20</sup> La'kzi bi chle'icho Chioza', chle'icho diika' bene' na' chakbe'icho ka nake'. Daa b<sub>x</sub>e bsile' yell-lioni nakbia'cha nake' Chios na' ye<sub>l</sub>' wak <sub>ch</sub>e'na' biga te <sub>ch</sub>eyin. Na' bibi de dii wda'i ben' inagake' bi nezgakile' shi zoe'. <sup>21</sup> La' la'kzi nezgakile' zoa Chioza', bi choe'la'ogake'ne' ni bi choe'gake'ne' ye<sub>l</sub>' cho<sub>x</sub>ken. San yoolə yichjgake' diika' bi zakii na' n<sub>ch</sub>ol n<sub>n</sub>iti yichjlall'do'eka' daa bi ntegakile'. <sup>22</sup> La'kzi nazgake' nakgake' ben' sin', daa chongake' chli'n nakgake' ben' bi

nteyi. <sup>23</sup> Lwaa dii nan koogake' Chioza' balaan, beena' biga te cheyin, lwaa lsak' benecha'lə, ben'ka' chde cheyin, wloogake' balaan, na' axt no lwaa lsak' ba ze xan yabana', na' lwaa lsak' ba zoa tap ni'a na'yin, na' lwaa lsak' ba chxob le'in.

<sup>24</sup> Na' daa chongake' ka', Chioza' ba wchoonlallee le-gake' kwenche gonchgage' dii zbanka' cheeni beli chen che'ka', na' benlen ljwellgake' diika' nak zban. <sup>25</sup> Lwaa dii nan shajle'gake' daa nak dii li che Chioza', wya-zlall'chgage' daa nak de wxiye'. Be'la'ogake' diika' bxe bsil Chioza' na' wloogake'n balaan lwaa dii nan koogake' le' balaan daa bxe bsile' legakan na' chidolee we'la'ochone' toshiizi. Kan' nakan.

<sup>26</sup> Daan, Chioza' ba wchoonlallee legake' kwenche gonchgage' dii zbanka' cheeni beli chen che'ka', na' axt noolka' chiyat'len ljwell noolgake' na' chongake' daa bi noe' Chioza' latj gongake'. <sup>27</sup> Na' ka'kzə ben' byoka', lwaa dii nan soalengake' noolə, chibalgakile' chiyat'len ljwell ben' byogake', na' chonlen ljwellgake' daa nak dii zban. Na' chzak'zi'len beli chen che'ka' yei' zak'zi'na' daa chido'gake' daa chongake' dii malka'.

<sup>28</sup> Na' daa bi goklall'gake' wzenaggake' che Chioza', wlej yichje' legake' kwenche gontegagake' dii mala' kon ka nan loo yichjlall'do'eka' daa nxinj. <sup>29</sup> Shgal' dii bi yejni'alalii chongake', choe'gake' cho'a xbayi beli chen che'ka', chzelall'gake' gat' kwe'gakile', chibagakile' gongake' dii malka'. Nakgake' ben' xe' ben' xga', ben' wen xya, ben' wishagdilə, ben' wxiye', ben' chibayi gon mal che ben', ben' wichitj dill', <sup>30</sup> ben' chyilj chzan xtill' ben', ben' chakzbani Chioza', ben' bibi nalli, ben' cha'sibə na' ben' chshalj chshon. Chiyiljlall'gake' bi dii mal gongake', bi chzenaggake' che xaxna'gake', <sup>31</sup> bi ntegakile', bi chongake' daa chchebgake', bi chakgakile'

ben', ni bi chiyesh'gakile' ben'. <sup>32</sup> La'kzi nezgakile' ba bchoglo Chioza' chiyal' guet ben'ka' chon ka', zizikchli chongake'n, na' axt chiba chizak'gakile' kat' chon ben' yoblan.

## 2

<sup>1</sup> Na' li' naa, nottezə nako', kat' chchoglo' che ben' nape' dol' lao Chioza', lekzka' che kwinon' chnio', la' lenkzo' chono' diika' chongake', na' bibi de wda'ilo'n ino' bibi xtoloo de. <sup>2</sup> Na' nezicho Chioza' chone' kon ka chiyal' gone' kat' chchogloe' sak'zi' ben'ka' chon dii malka' nak ka'. <sup>3</sup> Na' li' no' che ben'ka' chon dii malka' napgake' dol', bi gakzilo' wilo' lo yel' zak'zi' che Chioza', la' ka'kzan chono'. <sup>4</sup> Achakzilo' bi wsak'zi' Chioza' li' ni che daa chono'? Abi chakbe'ilo' ni che yel' ben' wen che'nan' chiyesh'lallile' cho' na' chape' yel' chxenlall' checho, daa cheenile' yiyaj yilenicho che dii malka' choncho? <sup>5</sup> Per daa nako' yichjlall'do' chech na' bi cheenilo' yiyaj yilenilo', kwintezo' chkwa' chti'azo' yel' zak'zi'ka' illaglo' kat' illin lla wchoglo Chioza' che ben' kon ka chiyal' gone'. <sup>6</sup> La' Chioza' gone' ka gak che to to ben' kon ka chidolee. <sup>7</sup> Ben'ka' zoatezi zoagake' chongake' daa nak wen kwenche sho'gake' balaan, wi'e yel' mban chegake' zejli kani na' biga llia ile'gakile' yel' wita'. <sup>8</sup> Na' ben' yaalall'ka', ben'ka' chzoagake' ka'lə daa nak dii li na' nogake' diika' bi yejni'alalii, wsak'zi'e legake' daa le chllée legake'. <sup>9</sup> Yel' zak'zi' wal yen ile'i yog' ben'ka' chon dii mala', zigaate ben' Israelka' na'tech ben'ka' bi nak ben' Israel. <sup>10</sup> Per ben'ka' chon dii wenna', sho'gake' balaan na' soagake' mbalaz, zigaate ben' Israelka' na'tech ben'ka' bi nak ben' Israel.

<sup>11</sup> La' Chioza', tlap chone' yel' joschis, aga nakzi ben' chakile'. <sup>12</sup> Yog' ben'ka' bi nombia' ley daa bzej dii

Moiséza' kwiayi'gake' shi bengake' dii mala', la'kzi bi nezgakile' daa nan. Na' yog' beṅ'ka' ben dii mala' na neztegakile' daa na leya', choglo chegake' kon ka na leya' gak chegake'. <sup>13</sup> La' kono yiyak beṅ' li beṅ' shao' lao Chioza' daa nombia'ze' leya', san beena' chon kon ka nan, len' yiyake' beṅ' li beṅ' shao' lawe'na'. <sup>14</sup> Ka nak beṅ'ka' bi nak beṅ' Israel na' bi nezgakile' bin na ley che dii Moiséza', shi tobialozgake' chongake' ka na leya', nakbia' yoo to ley loo yichjlall'do'eka'. <sup>15</sup> Na' daa chongake' ka', chli'n yoo loo yichjlall'do'eka' daa cheeni leya' gongake'. Na'ch yichjlall'do'eka'kzə chonan ka chakbe'gakile' shi dii wen wa shi dii malan bengake'. <sup>16</sup> Kan' gak llana' gon Chioza' lo na' Jesucristona' wchogloe' che diika' yoo loo yichjlall'do' beṅ' yell-lioni, kon ka na dill' wen dill' kob che'na' daa cho'a dill'.

<sup>17</sup> Na' li' nako' beṅ' Israel, chakilo' nako' beṅ' wen lao Chioza' daa nezilo' daa na ley che dii Moiséza' na' chep cha'laloo daa nombi'o Chioza'. <sup>18</sup> Chakilo' nezilo' daa cheeni Chioza' gono' daa chli' chsedi leya' li' gono' daa nakch wen. <sup>19</sup> Chakilo' wak koo beṅ' lo nez li che Chioza' na' gaktio' ka beeni' lao beṅ'ka' chda lo yel cholā'. <sup>20</sup> Na' chakilo' wak wzajniilo' beṅ' bi nteyi na' wakte wli' wsedilo' beṅ'ka' biṅ' shajni'yenii daa nombi'o leya' daa nsa' do ka nak yel' chajni na' daa nak dii li. <sup>21</sup> Na' shi li' chli' chsedilo' beṅ' yoblə, ¿berache bi chli' chsedi kwino'? Na' shi chsedilo' beṅ' bi kwane', ¿berache li'lə chbanzo'? <sup>22</sup> Na' li' chsedilo' beṅ' bi chiyal' soalene' nool bi nak nool che', wa beṅ' byo beṅ' bi nak beṅ' che', ¿berache li'lə chonzo' ka'? Na' li' chwiilo' lwaa lsak' diika' choe'la'o beṅ', ¿berache chzi' chbanzo' bi de loo lill xlatjinka'? <sup>23</sup> Chshalj chshono' daa nombi'o leya', per chnit chdio' Chioza' daa bi chono' ka nan. <sup>24</sup> Dii liyen'nan na Cho'a Xtill' Chioza': "Beṅ'ka' bi nak beṅ' Israel chnegake' zban

che Chioza' ni chele daa chonle mal.”

<sup>25</sup> Dii li sen daa le circuncisión daa yoo kwerp cho'na' zak'kzin shi chzenago' daa na leya', per shi bi chzenago'n bibi zjanayi daa yoo senna'. <sup>26</sup> Na' shi beena' bi yoo senna' chone' ka na leya', lao Chioza' nake' ka ben' yoo sen. <sup>27</sup> Na' beena' chon ka na leya' la'kzi bi yo'e senna', yili'e lawo' napo' dol' daa bi chono' ka na leya' la'kzi nombi'on na' yootio' senna'. <sup>28</sup> Bi gakzilo' nako' dowalj ben' Israel daa chono' yog' diika' yoolocho choncho cho' ben' Israel, ni daa yoo kwerp cho'na' senna'. <sup>29</sup> San dowalj ben' Israel nak beena' nonjilall' Chioza' do yichj do lallee, na' daa ba bikob Espiritu che'na' yichjlall'do'ena' nakan ka senna' daa chli'n nake' lall' na' Chioza'. Na' che beenin we' Chioza' xtillee chone' wen, aga ben' yell-lionin.

### 3

<sup>1</sup> Na' ¿bera yel' goklen che ben' Israelka' de? Na' ¿bera banez si'gake' daa yoogake' sen daa le circuncisión? <sup>2</sup> Dii xen wal banez chegake' de. La' zigaate, legaken' be' Chioza' Cho'a Xtilleena'. <sup>3</sup> ¿Anti chakile ni cheyi daa bi chajle' bal ben' Israelka' che', ba wlej yichje' legake'? <sup>4</sup> Bi nakan ka! Chioza' toshiizi chone' ka ba bchebe' gone' la'kzi yog' ben' yell-lioki nakgake' ben' wxiye'. Cho'a Xtilleena' nan:

Daa nchogbi'o gak che ben' saaxyana' nakbia'chan zejan shli,

na' gakbe'gakile' chono' yel' joschis kon ka chiya' gakan.

<sup>5</sup> Na' shi dii mala' choncho chli'n Chioza' nake' ben' li ben' shao', ¿bera inacho, lla? ¿Ainacho Chioza' bi nake' ben' wen daa chsak'zi'e ben'ka' chon mal? (Nia' ka' daa chaki ben' yell-lioki ka'.) <sup>6</sup> Per ¿bi nakan ka! La', shel'ka' Chioza' bi nake' ben' li ben' shao', aga wak gone' yel' joschis che ben' yell-lioni.

<sup>7</sup> Na' zoa beṅ' nagake', shi yeḷ' wxiye' chechona' chli'n yeḷ' li che Chioza' na' chisgolan balaan che'na', ḷbiche naze' nakcho beṅ' saaxya, shka'? <sup>8</sup> Na' daa chakgakile' ka', wnaljagake': "Goncho dii mala' kwenche sho'che' balaan." Zoa beṅ' nagake' kan' chli' chsedinto', per bi nakan ka'. Na' beṅ'ka' naz ka' chidoḷ'gake' yeḷ' zak'zi' che Chioza'.

<sup>9</sup> ḷNakra lla? ḷAnakchnto' neto' beṅ' Israel beṅ' wench aga ka beṅ' yoblə, lla? ḷBi nakan ka! ḷLa' ba wniakz' yog'cho, ka neto' beṅ' Israel na' ka'kzə beṅ'ka' bi nak beṅ' Israel, toz ka napcho doḷ' lao Chioza' daa ba bencho dii mala'. <sup>10</sup> ḷLa' Cho'a Xtill' Chioza' nan:

Kono beṅ' li beṅ' shao' zoa, ni tlišee.

<sup>11</sup> Ni to beṅ' bi chajniile' daa nak dii li, ni kono zoa beṅ' chiyilj Chioza'.

<sup>12</sup> Yog'z beṅ' ba wlaagake' lo nez lina', na' yog'zgake' nxinj yichjlall'do'eka'.

Ni togagake' bi chon dii wen.

Ni tliš' beṅ' chon wen bi zoa.

<sup>13</sup> Ka zban chḷa' to loo ba che beṅ' wet dii nyalj, kan' nak dill' zbanka' chchej cho'a lolleeka'.

Kon cho'a lolleeka' chziye'gake'.

Na' ka yierb che beḷ' nak dill'ka' choe'gake'.

<sup>14</sup> Lillinzə chyishjgake' bia' blag' che beṅ' na' choe'gake' dill' zi'bia'.

<sup>15</sup> Bi nallgakile' chittezgake' beṅ'.

<sup>16</sup> Gattezə zejgake' chlliyai' chlliadegake' na' chgoogake' yeḷ' zi' yeḷ' yesh'.

<sup>17</sup> Bi nombia'gake' bi daa ne' soalengake' beṅ' mbalaz.

<sup>18</sup> Bi chall chllebgake' gon Chioza' xya chegake'.

<sup>19</sup> Na' nezicho beṅ'ka' nagake' chongake' daa na ley che Chioza' chiyaḷ' gongake' doxen ka nan. Na' daa kono gok

gonan, ba bchoglo Chioza' che yog'lolcho, cho' ben' yellio, ka neto' ben' Israel na' ka ben' bi nak ben' Israel, napcho dol', na' ni to kono gak ina: “Bibi dol' nap'.”  
<sup>20</sup> Daan, ni to ben' bi gak ine' nake' ben' li ben' shao' lao Chioza' daa chone' ka na leya'. La' leya' chonan ka chakbe'icho nakcho ben' saaxya.

<sup>21</sup> Na' naa Chioza' ba bliile' cho' nakan goncho kwenche yiyakcho ben' li ben' shao' lawe'na', na' aga daa goncho ka na leyan'. La' ka leya', na' ka diika' bzej dii ben'ka' wdixjee daa goll Chioza' legake', toz ka choe'gakan dill' cheyin.

<sup>22</sup> Chioza' ne' yog'lol ben' gonlilallee Jesucristona' yiyake' ben' li ben' shao' lawe'na', nottezə nake'. <sup>23</sup> La' yog'lolza ben' bxinj blengake' na' ni to kono nak dowalj ben' wen ka nak Chioza'. <sup>24</sup> Per daa nak Chioza' ben' wen, chiyone' ben' ben' li ben' shao' daa wdixj Cristo Jesús'a saaxya che'ka', na' bibi zak'gakile'n. <sup>25</sup> Chioza' bselee Crístona' blalj xchene'na' na' wite' ni che saaxyaka' bencho. Na' ni che xchene'na', nottezə ben' gonlilalleene', Chioza' yizi'xene' saaxya che'na'. Na' ka' chli'e nan nake' ben' chon daa nak shli. La' daa nape' yei' chxenlall', bene' ka'z saaxyaka' ben ben' kana' bin' wselee Crístona'. <sup>26</sup> Na' naa, daa bselee Jesucristona' chli'e nake' ben' chon daa nak shli daa ne' nottezə ben' gonlilallee Jesús'a nake' ben' li ben' shao' lawe'na'.

<sup>27</sup> Kono gak wshalj wshon ine' nake' ben' li ben' shao' lao Chioza' ni che ba bene' ka na leya'. La' aga no chon doxen ka nan, san Chioza' ne' nottezə ben' gonlilallee Crístona' nake' ben' li ben' shao' lawe'na'. <sup>28</sup> Na' ba nezicho chiyakcho ben' li ben' shao' lao Chioza' daa chonlilall'cho Jesucristona' na' aga daa choncho daa na leyan'.

<sup>29</sup> ¿Achakile Chioza' nake' Chios che to ben' Israelka'zə? ¿Bi nakan ka! Lekzka' nake' Chios che ben'ka' bi nak



ben' Israel. <sup>30</sup> La' toz Chiozan' zoa, beena' chiyone' ben' li ben' shao' ben'ka' chonlilall' Crístona'. Na' toz ka chone' che nottezə ben' chonlilalleene', ka ben' Israel, ben'ka' yoo sen daa le circuncisión, na' ka ben' bi nak ben' Israel. <sup>31</sup> ¿Achakile daa chonlilall'cho Jesúza' chzoacho leya' ka'lə? ¿Bi nakan ka'! La' nezicho nakan to dii zakii.

## 4

<sup>1</sup> ¿Bera ka inacho che dii xoxxto'cho Abrahamá'? Nak gok biyake' ben' li ben' shao' lao Chioza'. <sup>2</sup> Shel'ka' biyak dii Abrahamá' ben' li ben' shao' lao Chioza' ni cheyi diika' bene', zaklja bshalj bshone' lao ben' yell-lioni, per aga lao Chioza'. <sup>3</sup> La' Cho'a Xtill' Chioza' nan: “Dii Abrahamá' wyajli'e che Chioza', na' Chioza' wne' nake' ben' li ben' shao' lawe'na'.” <sup>4</sup> Kat' to wen llin chkaa laxje', bi nakan to dii chzani ben' cho'ene', san nakan dii chiyal'kz wi'ene'. <sup>5</sup> Per shi to ben' shajli'e che Chios, beena' chiyon ben' saaxyana' ben' li ben' shao', Chioza' ile'ile'ne' ben' li ben' shao' daa gonlilalleene', la'kzi bibi bene' kwenche idolee yel' goklen che Chioza'. <sup>6</sup> Dii Davina' bi'e dill' che yel' mbalaz che beena' na Chioza' nake' ben' li ben' shao' la'kzi bibi bene' kwenche bdojile'n. <sup>7</sup> Ki wna dii Davina': Chakomba beena' ba biyakxen xtoleena', na' ba biyol binit saaxya che'na'.

<sup>8</sup> Chakomba beena' bi yizi' Xancho Chioza'ne' kwent.

<sup>9</sup> ¿Achakile to ben'ka' yoozgake' sen daa le circuncisión wak soagake' mbalaz? Bi nakan ka', san lekzka' ben'ka' bi yoo senna' wak soagake' mbalaz. La' ba wniakz' Chioza' wne' dii Abrahamá' goke' ben' li ben' shao' lawe'na' daa wyajli'e che'. <sup>10</sup> Na' ¿batran wna Chioza' ka'? ¿Aba wyoo dii Abrahamá' senna' kana' wna Chioza' nake' ben' li ben' shao'? ¿Awa bin' sho'en? Chioza' wne' ka' kana' bin' sho'en. <sup>11</sup> Na'techlə wloo kwine' sen daa le

circuncisión na' senna' bli'n ba nake' ben' li ben' shao' lao Chioza' daa benlilalleene'. Daan, dii Abrahamama' nake' xoxzto' yog' ben' nak ben' li ben' shao' lao Chioza' daa nonlilall'gake'ne', la'kzi bi yoogake' senna'. <sup>12</sup> Na' dii Abrahamama' lekzka' nake' xoxzto' neto' yoonto' sen daa le circuncisión. Per aga daa yoonto' senna'zan, san daa nonlilall'nto' Chioza', beena' ba nonlilall' dii Abrahamama' kana' zi' sho'e senna'.

<sup>13</sup> Chioza' bchebe' gaki che dii Abrahamama' len xiin dia che'ka' doxen yell-lioni. Na' bchebe' wi'en legake' aga daa bengake' doxen ka na ley che dii Moisézan', san daa benlilall' dii Abrahamama' Chiozan', wna Chioza' nake' ben' li ben' shao' lawe'na'. <sup>14</sup> La' shel' to ben'ka' chonz ka na leyan' gaki chegake' daa bcheb Chioza' wi'e dii Abrahamama', bibi zjanayin gonlilall'cho Chioza' na' aga bi zakii daa bchebe' gone', shel'ka'. <sup>15</sup> Leya' nsa'n yel' zak'zi' che ben'ka' bi chon ka nan. Per shi bibi ley de, aga bi de dii inan napgake' dol'.

<sup>16</sup> Ka nak daa bcheb Chioza' gone' che dii Abrahamama', nakan to goklen daa chone' che nottez ben' nonlilalleene' kwenche yog'zə xiin dia che'ka' ikaagake' daa we' Chioza' legake'. Bi nakan che to ben'ka' chonz ka na leya', san lekzka' nakan che nottezə ben' chonlilall' Chioza' ka benlilall' dii Abrahamama' le'. La' dii Abrahamama' nake' xoxzto' yog'cho cho' nonlilall'chone'. <sup>17</sup> Ka na Cho'a Xtill' Chioza': “Ba nzoa' li' kwenche gako' xaxna' ben' zan inlleb.” Na' Chioza', beena' benlilall' dii Abrahamama', nape' yel' wak yisbane' ben' wetka' na' wxə wsile' diika' bin' gak.

<sup>18</sup> Kana' bich non dii Abrahamama' lez soa xiine', wyajli'e daa goll Chioza'ne' na' bene' lez gak ka golle'ne'. Ka' gok biyake' xoxzto' ben' zan inlleb, kon ka goll Chioza'ne', chi'e: “Kan' shesh shan xiin dia cho'ka'.” <sup>19</sup> Biga gokcho-plallee che Chioza', la'kzi chakbe'ile' ba nake' ben' golə

par soa xiine', la' ba zoa gakile' to guiyoa yizan. Na' ni bi gokchoplallee la'kzi gok dii Sárana' nool will. <sup>20</sup>Bi gokchoplallee, san zizikli benlilallee gak daa bcheb Chioza' gone' na' be'laweene'. <sup>21</sup>La' wnezile' kwaslo' Chioza' nape' yel' wak kwenche gone' yog' diika' chchebe'. <sup>22</sup>Daan ble'i Chioza'ne' ben' li ben' shao' daa wyajli'e che'.

<sup>23</sup>Na' daa nan “Chioza' ble'ile'ne' ben' li ben' shao'”, aga che tozen' nan ka', <sup>24</sup>san lezkza' cho'en dill' checho cho' nonlilall'cho Chioza', beena' bisbane' Xancho Jesucrístona' ladj ben' wetka', la' lenchon chle'i Chioza' ben' li ben' shao' daa nonlilall'chone'. <sup>25</sup>Bzani Chioza' Xancho Jesucrístona' wite' ni che saaxya chechoka' na' bisbane'ne' ladj ben' wetka' kwenche biyakcho ben' li ben' shao' lawe'na'.

## 5

<sup>1</sup>Chioza' ba biyone' cho' ben' li ben' shao' daa ba nonlilall'chone', na' ba bizoalenchone' wen daa wit Xancho Jesucrístona' ni checho. <sup>2</sup>Na' daa ba nonlilall'cho Crístona', Chioza' toshiizi chonile' cho' wen na' chibaicho daa noncho lez lljazoalenchone'. <sup>3</sup>Na' aga to dgazan yibaicho, san lezkza' yibaicho yel' zak'zi'ka' chle'icho yell-lioni, daa nezicho chongakan ka soachecho gonlilall'chone'. <sup>4</sup>Na' shi zoachecho chonlilall'chone' shlak chllaglocho yel' zak'zi'ka', na' chli'n nakchacho lao Chioza'. Na' shi nakchacho lao Chioza' na' noncho lez lljazoalenchone'. <sup>5</sup>Na' ka nak daa noncho lez, bi te bi la ki gakan, la' Chioza' ba bliile' cho' yel' chaki che'na' daa ba nzoe' Espiritu Santo che'na' loo yichjall'do'choni.

<sup>6</sup>Kana' ni nakcho ben' wen dii mal na' aga bi gok goncho kwenche bi kwiayi'cho, kana'yen' bid Crístona' wite' ni checho cho' nakcho ben' saaxya. <sup>7</sup>Aga ga zoa to ben' lii izanteyi kwine' guete' ni che to ben' nak ben' li ben' shao'. Kayaadia shi yiyaxji to ben' izani

kwine' guete' lwa'a to beṇ' wen. <sup>8</sup> San Chioza' bli'e ka chakile' cho' daa bzanile' Crístona' wite' ni checho kana' ni nakcho beṇ' saaxya. <sup>9</sup> Daa blalj xchen Crístona' wite' ni checho, ba biyon Chioza' cho' beṇ' li beṇ' shao' lawe'na'. Na' daa wite' ni checho, ¿alechlin ki yisle' cho' lao yeḷ' zak'zi'na' kat' illin lla wchoglo Chioza' che yog'loḷ beṇ'? <sup>10</sup> Shi kana' chakzbanicho Chioza', bselee Xiine'na' wite' ni checho kwenche bizoalenchone' wen, ¿alechlin naa ba bisbane'ne' ladj beṇ' wetka' ki yisle' cho' daa ba zoalenchone' wen? <sup>11</sup> Na' aga diika'z chibaicho, san lekzka' daa nombia'cho Chioza', la' ni che Xancho Jesucristonan' bizoalenchō Chioza' wen.

<sup>12</sup> Ni che yeḷ' widenag che toz beṇaan golj wxē saaxyana' yell-lioni, na' ni che saaxyana' wyoo yeḷ' wita'. Ka' gok wzolo chet yog' beṇ', la' yog'zə beṇ' chongake' dii mala'. <sup>13</sup> Kana' zi' we' Chioza' dii Moiséza' ley che'na', ba chonkzə beṇ' yell-lioni dii mala'. Per shi bibi ley de, aga bi de dii gawan xya chegake'. <sup>14</sup> La'kzi aga bi ley got' dii gawan xya chegake', yeḷ' wita' wṇabia'n lao yog'loḷ beṇ'ka' beṇ' dii mala' wzololenzan dii Adánna' blinten kana' wban dii Moiséza', la'kzi bi wdishgake' cho'a xtill' Chioza' ka beṇ' dii Adánna'. Ni che dii Adánna' wyoo yeḷ' wita' yell-lioni, san Jesucrístonā', beena' wloo Chioza' xnezin wselee kani'teyi, bxie' yeḷ' mban zejli kani.

<sup>15</sup> Per ka nak dii mala' beṇ' dii Adánna', bi gak wsaklebichon ka dii wenna' beṇ' Chioza' checho, dii xen wal nlla'n. Daa bxinj bḷen dii Adánna' yog'zə beṇ' chet, san daa bseḷ' Chioza' Jesucrístonā' kwenche wite' ni checho, bene' to dii wen inleeb che yog' beṇ' gonlilalleene'. <sup>16</sup> Bi gak wsaklebicho daa beṇ' dii Adánna' kon yeḷ' goklen daa beṇ' Chioza' checho. La' wchogbia' che yog'loḷ beṇ' guetgake' ni che toz dii mala' daa beṇ' dii Adánna'; san yeḷ' goklen che Chioza' daa chone' checho chiyone' cho' beṇ' li

ben' shao' lawe'na', la'kzi nakcho ben' saaxya nllēb. <sup>17</sup> Shi yel' wita' wñabia'n daa bxinj bñen dii Adánna', ¿alechlin ki inabia' ben'ka' ba biyon Chioza' ben' li ben' shao' daa nake' ben' wen inllēb, ni che Jesucrístona', beena' be' to yel' mban kob chegake'?

<sup>18</sup> Dii mala' ben dii Adánna' benan ka bñoglo Chioza' che yog' ben' guetgake', na' ka'kzə dii wenna' daa ben Jesucrístona' benan ka yog' ben'ka' gonlilall'gake'ne' yiyakgake' ben' li ben' shao' na' gat' yel' mban chegake' daa bi te cheyin. <sup>19</sup> Daa gok dii Adánna' widenag, wñoglo che yog' ben' nakgake' ben' saaxya, per daa gok Crístona' ben' wizoza dill', ben' zan yiyak ben' li ben' shao'.

<sup>20</sup> Chioza' bi'e ley che'na' kwenche wyanch xto! ben' yell-lioni daa bi bzenaggake' cheyin. Per la'kzi wyanch xtoleeka', Chioza' bli'che' yel' chiyesh'lallii che'na'. <sup>21</sup> Na' daa chet yog' ben', chli'n saaxyana' napan yel' wak wsi wñogon cho'. Per lekzka' yel' chiyesh'lallii che Chioza' chli'n napan yel' wak yiyonan cho' ben' li ben' shao' na' gonan yel' mban checho zejli kani ni che Jesucrístona', beena' nak Xancho.

## 6

<sup>1</sup> ¿Beran inacho naa, lla? ¿Agonchcho saaxyana' kwenche wli'ch Chioza' yel' chiyesh'lallii che'na'? <sup>2</sup> ¿Aga kan' goncho! La' cho' ba nakcho ka ben' ba wit lao saaxyana' daa bich chñabi'an cho'. Daan, bich chiyal' gonchon txen. <sup>3</sup> ¿Abi ñezile ka wchoacho nisa' daa nakcho Cristo Jesúza' txen, lekzka' zejín witlenchonen'? <sup>4</sup> Daa wchoacho nisa' zejín witlenchone' na' bgash'lenchone' kwenche gat' to yel' mban kob checho ka gok che Crístona' kana' bisban Xacho Chioza' le' kon yel' wak xen che'na'.

<sup>5</sup> Na' daa ba witlenchone', ka'kzan yibancho ka bibane' ladj ben' wetka'. <sup>6</sup> Ñezicho yel' mbanna' nsa'cho kana',

wliayi'n ka wit Crístona' lee yag cruza' kwenche bich we'cho cho'a xbayi beli chenna' na' bich inabia' dii mala' cho'. <sup>7</sup>La' kat' to ben' ba wite', bich chnabia' dii mala' le'. <sup>8</sup>Na' shi ba witlencho Crístona', ba nxenlall'cho lekzka' ibanlenchone'. <sup>9</sup>Nezicho biban Crístona' ladj ben' wetka' na' bich guete' dii yoblə, la' bich so saki yel' wita' le'. <sup>10</sup>Na' ka wit Crístona', shlin shlaxjzan bsol bnite' yel' wak che saaxyana'. Na' daa mbane' naa, zoe' chone' ka cheeni Chioza'. <sup>11</sup>Na' ka'kzə le', chiyal' gakbe'ile ba nakle ka ben' ba wit lao saaxyana' daa bich chnabia'n le', per mbanle lao Chioza' na' zoale chonle ka cheenile' daa nakle Xancho Cristo Jesús'a txen.

<sup>12</sup>Daan bi chiyal' we'le latj inabia' dii mala' le' kwenche we'zle cho'a xbayi beli chen chelena' daa ile'i yel' wita'. <sup>13</sup>Bi chiyal' gon kwerp chelena' lall' na' saaxyana' kwenche gonle dii mala', san chiyal' gon kwindle do ka nakle lall' na' Chioza' kwenche gonle ka cheenile'. La' wak inacho Chioza' ba bisbane' le' ladj ben' wetka' daa ba bene' le' to yel' mban kob. <sup>14</sup>Bich chiyal' inabia' dii mala' le', la' bich zoale xni'a leya', san daa biyesh'lallii Chioza' le', ba zoalenle yel' goklen che'na'.

<sup>15</sup>¿Nakrazə, lla? Naa ba biyesh'lallii Chioza' cho', na' bich zoacho xni'a leya', ¿agonchcho dii mala'? ;Bi chiyal' goncho ka! <sup>16</sup>Nezkzile shi ba ben kwinchlo lo na' ben' kwenche goncho bittez daa ne', choe'cho latj chnabi'e chon'. Ka'kzan, shi chzenagcho che dii mala', na' inabia'n cho' na' wliayi'n cho'. Na' shi we'cho latj inabia' Chioza' cho', wiyone' cho' ben' li ben' shao'. <sup>17</sup>Per choxken Chioza', la'kzi kana' wñabia' dii mala' le' na' benle ka nan, naa do yichj do lall'le ba chzoale xtilleena' daa bli' bsedgakile' le'. <sup>18</sup>Naa ba biyell bila'le lao dii mala', na' ba biyakle lall' na' Chioza' kwenche gonle ka cheenile'. <sup>19</sup>Ba bi'a dill' che daa chak checho cho' benech kwenche

shajniile dga nia' le'. Kana' ben kwinle lall' na' saaxyana' len dii zbanka' cheeni beli chen chehena' kwenche benle dii malka'. Na' naa, li gon kwinle lall' na' Chioza' kwenche soale gonle ka cheenile'.

<sup>20</sup> Shlak be'le latj wñabia' dii mala' le', aga bzenagle che Chioza' na' bi benle ka cheenile'. <sup>21</sup> Na' aga bi banez wxi'le che dii mala' benle na' naa chiyii chido'lenile'n, la' yel' witchokzan nsa'n. <sup>22</sup> San naa ba bisell bila' Chioza' le' lo ni'a na' dii mala' na' ba chonle ka cheenile', de banez cheyin daa zejch chonle daa nak wen, na' gat' yel' mban chele zejli kañi. <sup>23</sup> Laxj beena' chon saaxyana' nakan yel' wit, san daa chzani Chioza' wi'e beena' gonlilallee Xancho Cristo Jesús'a' nakan to yel' mban zejli kañi.

## 7

<sup>1</sup> Le' ben' bish' na' le' ben' zan', nombia'le leya' na' nezile leya' chñabi'an ben' shlak mbane'. <sup>2</sup> Na' ka nak leya', cho'en dill' nan noola' nshagna' chiya' soalene' ben' che'na' shlak mbane', per shi guet ben' che'na', wak yikee ben' yoblə. <sup>3</sup> Shi lljsoalene' ben' yoblə shlak ni mban ben' che'na', nakan xya. Per shi ba wit ben' che'na', leya' nan wak yikee ben' yoblə, na' bi nakan xya.

<sup>4</sup> Na' ka'kzan chele le', nakcho txen nonlilall'cho Crístona', le' ben' bish'dawaa na' le' ben' zandawaa. Daa nonlilall'le Crístona', beena' wit ni checho, zejín lekzka' ba nakle ka ben' ba wit lao leya' na' bich chñabi'an le'. Na' naa ba biyakle lall' na' ben' yoblə, beena' wite' na' bibane' ladj ben' wetka', kwenche goncho ka cheeni Chioza'. <sup>5</sup> Kana' wzoacho be'cho cho'a xbayi beli chenna', leya' wloochan ltip beli chen chechoka' na' benchcho dii mala', na' saaxyana' daa bencho bsa'n yel' wit. <sup>6</sup> Per naa, ba nakcho ka ben' ba wit lao leya' daa btakw bchejan cho', na' ba biyell bila'cho kwenche goncho ka cheeni Chioza'

daa ba bikob Espírítu Sántona' yichjlall'do'choni, na' bich chnabia' leya' cho'.

<sup>7</sup> Bi chiyal' inacho leya' nakan dii mal. La' lennan' bzajniin nad' nan malan' chon'. Aga nezid' shi nakan mal selallaa bi de che ben' shel'ka' ki leya' nan: “Bi selalloo bi de che ben'.” <sup>8</sup> Per dii mala' yoo loo yichjlall'dawaani bchinan dga bllia Chioza' bia' kwenche wloochan ltip beli chen cha'ni na' chiya dii wzelallaa. La' shel' bibi leya' got', bibi de daa inan nakcho ben' wixinj wilén, shel'ka'. <sup>9</sup> Kana' bin' inezid' daa na leya', gokid' le wen nsa' cha', per ka wnezid' daa nllia leya' bia', zizikli benz' dii mala' daa wlliyi' nad'. <sup>10</sup> Daa bllia Chioza' bia' goncho kwenche gaklenan cho' gat' yel' mban checho, bchoglolan cha' nan chiyal' guet'. <sup>11</sup> La' dii mala' yoo loo yichjlall'dawaani bchinan leya' na' wxiye'n nad' kwenche blliyi'n nad'.

<sup>12</sup> Leya' dii licha nakan che Chioza', na' yog' daa nllian bia' nakan dii wna Chioza', nakan dii li dii shao' na' dii wen. <sup>13</sup> Leya' nakan wen na' aga lennan' benan ka kwiayaa. San dii mala' yoo loo yichjlall'dawa'nin bchinan leya' daa nak dii wen kwenche blliyi'n nad'. Na' daa nakan ka', ni che leya' bli'lao saaxyana' nakan dii mal inleeb.

<sup>14</sup> Nezicho leya' nakan che Chioza', san nad', lega ben' de beli chen chon', na' chnabia' dii mala' nad' daa chon' ka nan. <sup>15</sup> Bi chajniid' ka chon', la' bi chon' dii wenna' daa cheenid' gon', san dii mala' daa chakzbanid', lèlan chonz'. <sup>16</sup> Na' kat' chon' daa bi cheenid' gon', chakbe'id' leya' nakan wen. <sup>17</sup> Na' aga inacho nadaan chon' ka', san dii mala' daa daa yoo loo yichjlall'dawaanin chlligaan nad' kwenche chon' dii mala'. <sup>18</sup> Nad' nezid' aga bi dii wen cheeni beli chenni gonan. Na' la'kzi le lliallallaa gon' dii wenna', bi chak gona'n. <sup>19</sup> Bi chizoid' gon' dii wenna' daa cheenid' gon', san dii mala' daa bi cheenid'



gon', lēlan chonz'. <sup>20</sup> Na' daa chon' daa bi cheenid' gon', zējin aga nadaan chona'n, san dii mala' daa chñabia' loo yichjlall'dawaanin chonan daa.

<sup>21</sup> Chakbe'yēnid' la'kzi cheenid' gon' daa nak wen, dii malalə chon'. <sup>22</sup> La'kzi chibayi loo yichjlall'dawaani ley che Chioza', <sup>23</sup> chakbe'id' de daa chsej chllonan gon' daa nēzid' nak wen, la' dii mala' daa chñabia' nad' chtakw chchejan nad' kwenche gon' daa bi nak wen.

<sup>24</sup> ;Le nyesh' chak cha! ;Notgui yisell yila' nad' lao beli chenni dga ba nchogbia' kwiayi'? <sup>25</sup> Cho'a Chioza' yel' choxken daa wit Xancho Jesucristona' na' bisle' nad' lo na' dii mala'. Na' kin chajniida'n: chibaid' gon' ka na ley che Chioza', per beli chen cha'ni chlligaan nad' kwenche gon' dii mala'.

## 8

<sup>1</sup> Na' naa, bich bi yel' zak'zi' che Chioza' yen ile'i ben'ka' nak Cristo Jesús'a txen, ben'ka' bich chongake' ka na beli chen che'ka', san ba chongake' ka cheeni Espíritu che Chioza'. <sup>2</sup> La' daa nonlilall'cho Cristo Jesús'a, Espíritu che Chioza' ba bene' yel' mban kob checho, na' daa chñabia' Espírituna' cho', bich chñabia' saaxyana' cho' daa nsa' yel' wita'. <sup>3</sup> Ley daa bzej dii Moiséza' bi gok yislan cho' lao saaxyana' daa choncho ka na beli chenna'. Daan Chioza' bselee Xiine'na' goke' ben' de beli chen ka cho' per bi goke' ben' saaxya, na' wdixje' saaxya chechoka' ka wite' kwenche bich inabia'n cho'. <sup>4</sup> Chioza' bselee Crístona' ni checho kwenche so sakicho goncho wen lawe'na' ka na ley che'na'. Na' bich soacho goncho ka cheeni beli chenna' san soacho goncho ka cheeni Espíritu che Chioza'.

<sup>5</sup> Ben'ka' ni chzenag che dii mala' yoo loo yichjlall'do'eka', toz len zegake' wneyi chongake'; san ben'ka' chzenag che Espíritu che Chioza', zegake' wneyi gongake' daa cheenile'. <sup>6</sup> Ben'ka' yoo yichjgake' gongake'

dii mala', kwiayi'gake'; san ben'ka' yoo yichjgake' gongake' ka na Espíritu che Chioza', gat' yel' mban chegake' zejli kani na' soagake' mbalaz. <sup>7</sup> Ben'ka' chibayi chon dii mala', chakzbangakile' Chioza', la' bi chzenaggake' ka na ley che'na', ni bi chak gongake' ka nan. <sup>8</sup> Ben'ka' ni chibayi chon dii mala', Chioza' bi chazlallee ka chongake'.

<sup>9</sup> Per le', bich chzenagle che dii mala' san chzenagle che Espíritu che Chioza', shi ba zoe' loo yichjlall'do'lena'. Na' shi no bi zoa Espíritu che Crístona' loo yichjlall'do'ena', bi nake' lall' na' Crístona'. <sup>10</sup> La'kzi ba nakan guet kwerp chelena' daa nakle ben' saaxya, per shi nakle Crístona' toz, Espíritu che'na' zoe' loo yichjlall'do'lena' na' dekza yel' mban kob chele daa ba biyakle ben' li ben' shao' lao Chioza'. <sup>11</sup> Na' shi Espíritu che Chioza', beena' bisbane' Jesús'a' ladj ben' wetka', zoe' loo yichjlall'do'lena', Chioza' lekzka' gone' to yel' mban kob che kwerp chelena' daa guet, daa zoa Espíritu che'na' loo yichjlall'do'lena'.

<sup>12</sup> Daan, le' ben' bish' na' le' ben' zan', chonan byen goncho ka cheeni Chioza' na' bi goncho kon daa nazan che beli chenni. <sup>13</sup> La' shi we'chcho cho'a xbayi beli chenni, na' guetcho; san shi we'cho latj gaklen Espíritu che Chioza' cho' kwenche kwej yichjcho dii mala' daa nan goncho, na' gat' yel' mban checho zejli kani.

<sup>14</sup> Yog' ben'ka' chzenaggake' che Espíritu che Chioza' na' chongake' ka cheenile', legaken' nakgake' xiin Chios. <sup>15</sup> Cho' ba zoa Espíritu che Chioza' loo yichjlall'do'choni, bich chak checho ka chak che beena' zoa ben' chnabi'ene' na' chall chllebe'ne', san daa zoa Espíritu che'na' loo yichjlall'do'chonan', zejin ba wkaa Chioza' cho' ka xiine'. Na' daa zualen Espírituna' chon', chak che'chone': "Xadawaa." <sup>16</sup> Na' Espíritu che'na' lekzka' chzajniile' cho' kwenche chnezicho nakcho xiin Chios. <sup>17</sup> Na' daa nakcho

xiin Chioza', lekzka' wllin lla ikaalencho Crístona' daa gone', la' shi goncho banez yel' zak'zi'ka' ka diika' ben ble'i Crístona', na' gakchone' txen sho'lenchone' balaan.

<sup>18</sup> Na' ka nak yel' zak'zi'ka' chen chle'icho yell-lioni, aga wllinlebin ka balaan xenna' sho'lenchone'. <sup>19</sup> Na' yog' diika' bxe bsil Chioza' chbezgakan yob illin lla wli'lao ba nakcho xiin Chioza'. <sup>20</sup> La' yog' diika' bxe bsil Chioza' bich nakshao'gakan ka gokgakan dii nech. Na' aga legakannan' goklall'gakan gakgakan ka', la' Chiozan' bllie' bia' gakgakan ka', per lekzka' bene' kwenche chbezgakan yiyakshao'gakan. <sup>21</sup> La' wllin lla kat' yog' diika' bxe bsile' bich gakgakan dii kwiayi', san yiyakgakan mbalaz inlleb ka gak checho, cho' nakcho xiine'. <sup>22</sup> Na' nezicho axt naanlla yog' diika' bxe bsile' chak chegakin ka chak che to nool chillagloe' sane' bi'do' che'na'. <sup>23</sup> Na' aga toz diika' ben Chiozan' chak chegakin ka', ka'kzan chak checho, cho' ba yoocho Espíritu che'na', beena' chon ka noncho lez gonch Chioza' dii wen checho, chbellyesh'cho shlak chbezcho yiyone' kwerp chechoni to dii kob na' wli'lao ba none' cho' xiine'. <sup>24</sup> Kon ka bisla Chioza' cho' lo ni'a na' dii mala', noncho lez yikobe' kwerp chechoki. Aga daa ba den noncho lez, la' daa ba gok bich nakan dii goncho lez. <sup>25</sup> Per shi ni noncho lez ile'icho daa zi' gak, chiya' gapcho yel' chxenlall' shlak ni chbezcho gakan.

<sup>26</sup> Na' lekzka' Espíritu che Chioza' chaklene' cho' choncho daa bi chak goncho. La' aga nezicho nakan chiya'yen' we'llwillcho Chioza', per kwin Espíritu che'na' chbellyeshee chnabe' checho lawe'na'. Na' la'kzi aga bi dill' chchine', <sup>27</sup> Chioza', beena' nombi'e yichjall'do' yog'cho, nezile' bin chnab Espíritu che'na' checho. La' daa chaklall' Chiozan' chnabe' checho, cho' nakcho lall' nee.

<sup>28</sup> Na' nezicho Chioza' chchine' yog' diika' chen chle'icho kwenche gaklengakan cho', cho' ba chakichone',

cho' ba wleje' kwenche gakcho lall' nee kon ka gok-lallee. <sup>29</sup> Kana' bin' soatecho, Chioza' ble'shiile' cho' na' wleje' cho' kwenche yiyone' cho' ben' wen ka nak Xiine' Jesucristona', kwenche Jesucristona' gake' ben' llialo ladjchoni, cho' nakcho ben' bishee na' ben' zane'. <sup>30</sup> Chioza' wleje' cho' kani'teyi, na' lekzka' gox wñabe' cho' kwenche gokcho lall' nee, na' biyone' cho' ben' li ben' shao' lawe'na'. Na' cho' ba biyone' ben' li ben' shao', ba nakan sho'cho to balaan xen.

<sup>31</sup> ¿Bera dech inacho cheyi dga ba ben Chioza' checho, lla? La' shi Chioza' zoalene' cho', ¿nora gak bi goni cho'?

<sup>32</sup> Shi Chioza' axt ni Xiine'na' bi iyeshile' san bzani'e'ne' wite' ni checho, ¿alechlin ki gone' cho' yog'lol diika' bchebe'? <sup>33</sup> Aga no gak gao xya checho lao Chioza', la' len' ba wleje' cho' na' biyone' cho' ben' li ben' shao'. <sup>34</sup> Na' aga no gak wchoglo checho guetcho. La' Cristo Jesús'a wite' ni checho, na' bibantie' ladj ben' wetka'. Na' chi'e kwit de shli che Chioza', chñabe' gaklene' cho'. <sup>35</sup> Aga bi de dii gonan ka bich gaki Crístona' cho'. Ni yel' zi' daa chen chle'icho, ni dii lalljka' chak checho, ni daa chsak'zi' ben' cho', ni daa chbil chdoncho, ni daa bi de xalaancho, ni daa zoacho dii nxoll, wa shi wit ben' cho'. <sup>36</sup> Chak ka na Cho'a Xtill' Chioza' daa na:

Daa chzoanto' xtilloona' toshiizi de dii nxoll chento' witgake' neto'.

Chongakile' neto' ka xil'do'ka', baka' nzoagake' witgake'.

<sup>37</sup> Per Crístona', beena' chakile' cho', chaklene' cho' kwenche goncho gan lao yog'lolte diika' chen chle'icho.

<sup>38</sup> Na' daan neqid' aga bi de dii gonan ka bich gaki Chioza' cho': ni yel' wita', ni yel' mbanna', ni anjlka', ni dii xiw'ka', ni daa chak naa, ni daa zi' gakə, <sup>39</sup> ni dii chak gana' zeelo nak sib wal, ni dii chak gana' zeelo nak zitj wal, ni bittez dii yoblə dii bxe bsil Chioza' bi gak gonan ka bich gakile' cho',

la' ba bli'e le chakile' cho' daa wit Xancho Cristo Jesúza' ni checho.

## 9

<sup>1</sup> Daa nonlilallaa Crístona' cho'a dill' li, na' bi chziyaa. Na' lekzka' Espíritu Sántona' chzajniile' nad' kwenche nezi yichjlall'dawaani dga nia' nakan dii li. <sup>2</sup> Le nyesh' zoa' na' toshiizi le chjeli lall'dawaani, <sup>3</sup> na' axt shel' wxe'id' bich gaklen Crístona' nad' na' kwiayaa kwenche shicholò gaklenan ben' Israelka' ben'ka' nak ben' wlall cha' na' ben' bishaa. <sup>4</sup> Chioza' wleje' dii xoxxto'nto'ka' kwenche noni xiine' neto'. Na' got' to balaan chegake' daa wzoalene' legake'. Bchebe' gagkake' yell che', na' bi'e legake' ley che'na'. Na' bzajniile' legake' ka chiya!' we'la'ogake'ne', na' dii zan dii bchebe' gone' chegake'. <sup>5</sup> Neto' ben' Israel naknto' dia che dii Abrahama', dii Isaaca' na' dii Jacoba', na' Crístona' lekzka' golje' lo dia chento'na' ka bide' yellioni. Na' chiya!' we'la'ochone' zejli kani, la' len' nake' Chios na' chnabi'e lao yog'lolte dii de. Kan' nakan.

<sup>6</sup> Na' bi inacho Chioza' bi bene' ka bchebe' gone' chento', san daa gok, aga yog' ben'ka' golj lo dia che dii Israela' nakgake' dowalj ben' Israel. <sup>7</sup> Aga yog' ben' goljgake' lo dia che dii Abrahama' nakgake' dowalj xiin dia che'. Chioza' golle'ne': "Xiino' Isaaki gakb' xaxna' yog'lol xiin dia cho'ka' zi' zaak." <sup>8</sup> Dga chzajniin cho' nan aga ni che nakgake' xiin dia che dii Abrahama' nakgake' xiin Chios, san ben'ka' chajle' gone' ka bchebe' gone', legaken' noni xiine'. <sup>9</sup> Ki nak daa bcheb Chioza' gone' che dii Abrahama', chi'e: "Zi twiz ka naa zaa dii yoblə, na' Sárana' sane' to xiino' bi' byo."

<sup>10</sup> Na' aga dgazan. Lekzka' Rebécana' wxane' chop bi'do' che dii xoxxto'nto' Isaaca'. <sup>11-12</sup> Na' kana' zi' galj bi' kweshka', na' ni bin' gongakb' dii wen ni dii mal, Chioza'

bshaljlene' Rebécana', golle'ne': "Bi'na' galjə nech wlexj yichjb' lao bi'na' galjə koll'baa." Golle'ne' ka' kwenche chakbe'icho Chioza' chbeje' beena' gak xiine' kon ka ba bllie' bia' gak, na' chaxe' ben'ka' cheenile' gak xiine', ni bi chone' kwent shi bi ba bengake'. <sup>13</sup> Nakan kon ka na Cho'a Xtill' Chioza' daa na: "Gokid' Jacoba', na' bwiyd' Esaúna'."

<sup>14</sup> ¿Bera ka inacho, naa? ¿Awak inacho Chioza' bi chone' wen? ¿Bi nakan ka! <sup>15</sup> La' Chioza' golle' dii Moiséza': "Beena' cheenid' yiyesh'lallid' na' yiyesh'lallidee, na' beena' cheenid' gaklen' na' gaklenee." <sup>16</sup> Daan, nezicho aga daa le cheeni ben' gake' xiin Chiozan' kwej Chioza'ne', ni aga ni che bi dii chone'n, san Chioza' chbeje'ne' daa chiyesh'lallile'ne'. <sup>17</sup> La' Cho'a Xtill' Chioza' cho'en dill' ka golle' faraónna', beena' wñabia' Egíptona': "Bzoa' li' chñabi'o kwenche gon' ka ile'i ben' ye!' wak cha'na' na' kwenche gakbe'i yog' ben' lle' doxen yell-lioni nad' nak' Chios." <sup>18</sup> Na' kan' nakan, Chioza' chiyesh'lallile' ben'ka' cheenile' yiyesh'lallile', na' lekzka' chone' chech yichjlall'do' ben'ka' cheenile' gakgake' ben' widenag.

<sup>19</sup> Na' wnaljo': "Shi choncho kon ka ba nllia Chioza' bia' goncho, bi gak ine' napcho dol' lawe'na', la' aga wakə wsej wlloncho gak ka cheenile'." <sup>20</sup> Na' shi ka' chakilo', ¿nora nako' wsheshlenzo' Chioza'? Aga wak ine' to yes' yo yeen beena' benan: "¿Biçhe benzo' nad' ki?" <sup>21</sup> La' beena' chon yes' xwagka' wakə gone' benja' kon nak cheenile', na' wakte gone'n to yes' dii gon llin ga llialote, na' sto dii wchine' che bittez.

<sup>22</sup> Na' ka'kzə ba ben Chioza'. Ni che dii mala' chon ben' yell-lioni goklallee wliile' legake' ye!' chllaa che'na' na' gone' ka wli'lao ye!' wak che'na', per wzoile' wdape' ye!' chxenall' che ben'ka' chido!' ye!' zak'zi'na', ben'ka' ba nakan kwiayi'. <sup>23</sup> Na' lekzka', ba bli'e ka liizelozi ben'

wen inlleb nake' daa ba biyesh'lallile' cho' na' bizi'xene' checho, na' biyone' cho' ben' li ben' shao' kwenche idol'cho balaan ka yillincho lawe'na'. <sup>24</sup> Na' ba gox wñab Chioza' cho', aga balz neto' naknto' ben' Israelan', san len bal-le bi nakle ben' Israel. <sup>25</sup> Chak ka wna Chioza' daa bzej dii Oseaza', daa na:

Ben'ka' bi nak yell cha', yepgakee: “Nakle yell cha'.”

Na' ben'ka' bi gokid', yepgakee: “Chakid' le'.”

<sup>26</sup> Na' latja' gana' golle' legake' bi nakgake' yell che', wsi' ben' legake' xiin Chios yaa Chios ban.

<sup>27</sup> Ki wna dii Isaíaza' che ben' Israelka': “La'kzi shesh shan ben' Israelka' axt gakgake' ben' zan ka yox daa chi' cho'a nido'na', balchokzgaken' yilagake' kwenche bi kwiayi'gake'. <sup>28</sup> La' Xancho Chioza' lobe' wchogbi'e ka gak che yog' ben' lle' yell-lioni.” <sup>29</sup> Ka bzej dii Isaíaza', kana' wne':

Shel' Xancho Chioza', beena' nak liizelozí ben' yel' wak choo yel' wak xen, bi bkwaane' sto chop dia chechoka',

ba biyol binitcho ka gok che ben' yell Sodómaka' na' ben' yell Gomórraka', shel'ka'.

<sup>30</sup> ¿Nakra inacho, naa lla? Ben'ka' bi nak ben' Israel bi wzegake' wneyi kwenche yiyakgake' ben' wen lao Chioza', per daa benlilall'gake'ne', ba biyakgake' ben' li ben' shao' lawe'na'. <sup>31</sup> San ben' Israelka', la'kzi goklall'gake' yiyakgake' ben' wen lao Chioza' daa zejlangake' ley che'na', bi wxakgakile'n. <sup>32</sup> Na' ¿biche bi biyakgake' ben' li ben' shao' lawe'na'? Daa bi benlilall'gake'nen'. Kon gogkakile' ina Chioza' nakgake' ben' li ben' shao' daa chongake' daa na leya'. Na'ch gok chegake' ka chak che ben' chjachew' yaj, <sup>33</sup> yaja' daa chzetj Cho'a Xtill' Chioza', daa na:

Wselaa to ben' yell Siónna',

na' saklebile' ka to yaj daa chjächew' ben', na' ka to yaj dii  
 lljsho'gake' na' ibixgake'.  
 Na' beena' wxenilalleene', biga yiyajile' daa nxeni-  
 lalleene'.

## 10

<sup>1</sup> Na' le' ben' bish' na' le' ben' zan', daa lliallalaa na' daa  
 chnab' kat' choe'lwill' Chioza' chnabidee yisle' ben' wllall  
 cha'ka', ben'ka' nak ben' Israel, kwenche bi kwiayi'gake'.  
<sup>2</sup> Nez nle'id' chegake' zechgagake' wneyi gongake' ka  
 cheeni Chioza', toz daa bi nezgakile' nakyen'an cheenile'  
 gongake'. <sup>3</sup> Daa bi chajni'gakile' toz Chiozan' chiyone'  
 ben' ben' li ben' shao', chaklall'gake' yiyon kwingake'  
 ben' wen, na' bi cheengakile' gonlilall'gake' Crístona'  
 kwenche yiyakgake' ben' li ben' shao' lawe'na'. <sup>4</sup> La' daa  
 bid Crístona', bene' daa bi gok gon leya', na' yog' ben'ka'  
 gonlilall'gake'ne' yiyakgake' ben' li ben' shao' lao Chioza'.  
 Na' bich goncho lez daa goncho ka na leyan' yiyakcho ben'  
 wen lawe'na'.

<sup>5</sup> Dii Moiséza' bzeje' ka chiyal' gon ben'ka' zoa xni'a  
 leya' kwenche yiyakgake' ben' wen lao Chioza', na' nan:  
 “Nottezə ben' chon doxen ka na leya' si'e banez ye!  
 mban che'na'.” <sup>6</sup> Na' che ben'ka' nak ben' li ben' shao'  
 lao Chioza' daa nonlilall'gake'ne', wne': “Bi sa'lall'zle,  
 inale: ¿Nora gak shaj yabana'?”, (kwenche gone' ka yetj  
 Crístona' yell-lioni). <sup>7</sup> “Ni bi inale: ¿Nora gak yetj gana'  
 lle' ben' wetka'?”, (kwenche lljaleje' Crístona' ladje'ka').  
<sup>8</sup> Ki chizna daa bzej dii Moiséza': “Dillaa daa ba wna  
 Chioza' zoalenan le' na' ba yoon cho'a loll'lena' na' loo  
 yichjlall'do'lena'”, na' lennan' daa choe'lennto' le', nanto'  
 chiyal' gonlilall'le Crístona'. <sup>9</sup> Shi wi'o dill' Jesúza' nake'  
 Xancho na' shajli'o do yichj do lalloo nan Chioza' bis-  
 bane'ne' ladj ben' wetka', na' yisla Chioza' li' kwenche  
 bi kwiayoo. <sup>10</sup> La' daa shajle'cho do yichj do lall'chon,



iyakcho ben' li ben' shao' lao Chioza', na' lekzka' daa choe'cho dill' nan Crístona' nake' Xancho, yisle' cho' kwenche bi kwiayi'cho.

<sup>11</sup> Cho'a Xtill' Chioza' nan: “Nottez ben' gonlilalleene', biga yiyajile' daa benlilalleene'.” <sup>12</sup> Laa nakcho ben' Israel, laa bi nakcho ben' Israel, Crístona' nake' Xancho, na' chaklene' yog'cho cho' chnabcho yel' goklen lawe'na'. <sup>13</sup> La' nottezə ben' inabe' gaklen Xancho Crístona' le', na' yisle'ne' kwenche bi kwiayee. <sup>14</sup> Per ¿nakra gon ben' inabgake' gaklene' legake' shi bin' gonlilall'gake'ne'? Na' ¿nakra gongake' gonlilall'gake'ne' shi bin' yengakile' xtilleena'? Na' ¿nakra gak yengakile' xtilleena' shi kono zoa chixje'ile'n legake'? <sup>15</sup> Na' ¿nakra gak soa ben' chixjee xtilleena' shi kono wsel' legake'? Ka na Cho'a Xtill' Chioza': “Mbalaz inleeb kat' ila' ben'ka' zidtxje'gake' dill' wen dill' kob che Chioza'.”

<sup>16</sup> Per aga yog' ben' Israelka' chzenaggake' dill' wen dill' kob che Chioza'. Chak ka bzej dii Isafaza', gana' na: “Xan', kono chajle' dillaa daa chyixje'nto'.” <sup>17</sup> Daan, kwenche gonlilall' ben' Crístona' chiya' yengakile' xtilleena'.

<sup>18</sup> Na' nia': ¿Abin' yengakile' cho'a xtilleenan', Ila? ¿Yog'ze' ba bengakile'n! La' cho'a xtill' Chioza' nan: Cho'a xtilleeka' chllinan doxen yell-lioni axt gana' zeelo chiyoll chidon.

<sup>19</sup> Na' chiznia', ¿anti neto' ben' Israelan bi wyajniinto'n, Ila? Zajniinto'n. La' dii Moiséza' wdixji'e daa goll Chioza'ne' che ben' Israelka' kana' wne':

Nad' Chios gon' wen che ben'ka' bi nakgake' yell cha' kwenche gaklall'le gon' chele ka chon' chegake'.

Na' gon' kwenche illaale daa chon' wen che ben' zit'ka' ben'ka' bi napgake' yel' chajni.

<sup>20</sup> Na'tech dii Isafaza' biyaxjile' wne':

Ben'ka' bi wze wneyi gombia'gake' nad', ben' ka bem-  
bia'gake' nad'.

Na' ben' kwenche ben'ka' bi wyoo yichjgake' nad' bem-  
bia'gake' nad'.

<sup>21</sup> Na' dii Isaíaza' lekzka' wdixji'e daa goll Chioza'ne' che  
ben' Israelka' kana' wne': "Toshiizi goklallaa gaklen ben'  
widenagka', ben'ka' bi chzoa xtillaana'."

## 11

<sup>1</sup> Na' nia' jaba wlej yichj Chioza' yell che'na' toshiizin,  
lla? jBi nakan ka'! La' lekzka' nad' nak' ben' Israel.  
Golj' lo dia che dii Abrahamana' na' nak' xiin dia che dii  
Benjamínna'. <sup>2</sup> Kani'teyi wlej Chioza' neto' ben' Israel  
kwenche naknto' yell che', na' aga ba wlej yichje' neto'.  
jAbi chjtinile ka na Cho'a Xtill' Chioza' che Elíaza'? nan  
ka be'lwille' Chioza' wdawe' xya che ben' Israelka', chi'e:  
<sup>3</sup> "Xan', ben' wlall cha'ka' ba betgake' ben'ka' wdixjee  
daa gollo' legake' na' ba bliayi'gake' gana' chzeynto'  
bayix'ka' chonnto' li'. Stochga nad' chgaana', na' lekzka'  
cheengakile' witgake' nad'." <sup>4</sup> Na'ch Chioza' golle'ne':  
"Ni nzoa' galla mil ben' Israel, ben' chzenag cha' na' bin'  
wchek' xibe'ka' lao Baala'." <sup>5</sup> Na' ka'kzan chak naanlla, zi  
xonjchga neto' ben' Israel chzenagnto' che'. Na' yel' ben'  
wen che'na' wleje' neto' gaknto' lall' nee daa nake' ben'  
chiyesh'lallii. <sup>6</sup> Na' shi yel' ben' wen che'nan' wleje' neto',  
zejin aga wleje' neto' ni che shi bi dii wennan chonnto'.  
La' shel' wleje' neto' ni che dii wenna' chonnto', bi nakan  
to goklen daa bene' chento', shel'ka'.

<sup>7</sup> Ben' Israelka' goklall'gake' yiyakgake' ben' wen lao  
Chioza' tobial'all'zgake', na' bi gokan, san ben'ka' ba wlej  
Chiozan' bdoj' bllongakile'n. Na' ben'ka' sto, zizikchli  
gokchgake' ben' widenag. <sup>8</sup> Gok ka na Cho'a Xtill' Chioza'

daa na: “Chioza' b̄chōl̄ b̄nitile' l̄egake' kwen̄che bi sha-jni'gakile'. Na' axt̄ naanlla nakgake' ka to beṅ' bi chen chle'i.” <sup>9</sup> Ki wna dii Davina':

“Yiyakshga l̄nī che'ka' ka to yalj dii wzapan l̄egake', na' ka to dii chgōo ch̄chew'gake', na' sak'zi'gake'.

<sup>10</sup> Gakshgagake' ka beṅ' l̄chōl̄;

na' toshiizi gak ch̄egake' ka to beṅ' noa' to dii zii wal.”

<sup>11</sup> Na'ch nia': ¿Aada bi bzenag beṅ' Israelka' che Chiozan' wchoonlallee l̄egake' toshiizi, lla? ¿Bi nakan ka! San daa bi bzoagake' xtilleenan', na'chan bisle' beṅ'ka' bi nakl̄e beṅ' Israel kwen̄che beṅ' Israelka' l̄ekzka' gaklall'gake' yisle' l̄egake'. <sup>12</sup> Shi yeṅ' widenag che beṅ' Israelkan' benan ka gok wen che beṅ'ka' bi nak beṅ' Israel, ¿alechl̄e ki gakch wen ch̄egake' kat' beṅ' Israelka' yiyonl̄ilall'gake'ne'?

<sup>13</sup> De to dii cheenid' we'len' le' dill', le' bi nakle beṅ' Israel. Chioza' ba wleje' nad' na' bselee nad' laolena'. Na' do yich̄j do lallaa chon' dga bene' lall' na' gon', <sup>14</sup> kwen̄che shi baṅ' beṅ' wlall̄ cha'ka' gaklall'gake' gak ch̄egake' ka ba chwiagake' chak chele, na' yilagake' bi kwiayi'gake'.

<sup>15</sup> La' shi daa bzoa Chioza' beṅ' Israelka' ka'l̄e, bene' ka beṅ'ka' bi nak beṅ' Israel bizoalengake'ne' wen, l̄e mbalaz kat' illin lla yilebe' beṅ' Israelka' sto shii. La' gak ch̄egake' ka to beṅ' biban ladj beṅ' wetka'. <sup>16</sup> Na' shi lee kwana' chbejcho daa chonicho yetxt̄il necha' daa choe'cho Chioza', zej̄in doxente kwana' nakan che'. Na' shi lo yaga' nakan che Chioza', l̄ekzka' xoziiinka' nakgakan che'.

<sup>17</sup> Beṅ' Israelka' zaklebgakile' yag olivo wenna' daa b̄chogue' baṅ' xoziiinka', na' le' bi nakle beṅ' Israel zakleBILE' yag olivo yix̄aa daa bidee lee yag wenna'. Na' yag wenna' noxaan xozii yag olivo yix̄aa diika' bidee le'inna' na' cho'en yeṅ' mban ch̄egakan. <sup>18</sup> Per bi gakile nakchle

ben' wench aga ka ben' Israelka', ben'ka' zaklebi xoz' yaga' diika' b̄chogue'. Bi shep sha'lall'le, la' aga xoz' yagan' cho'en yel' mban cheyin san loinnan' choe'n yel' mban che xoziiinka'.

<sup>19</sup> Na' wnaljale: “B̄chogue' xoziiinka' kwenche bidee neto' le'inna'.” <sup>20</sup> Lekzile kan' nakan, la' daa bi benlilall'gake' Chiozan', bzoe' legake' ka'lə, na' biyakle lall' nee daa nonlilall'lene'. Daan, bi shep sha'lall'le, san li gall illeb Chioza'. <sup>21</sup> La' shi Chioza' bi biyeshile' xoz' yaga' diika' nak dowalj, lekzka' gone' chele shi naa. <sup>22</sup> Li gakbe'i ka ben' wen ben' shao' nak Chioza' na' lekzka' nake' ben' chsak'zi'. La' bsak'zi'e ben'ka' bi benlilall'gake'ne', na' ba chone' wen chele. Na' gonche' wen chele shi gonle ka dii le gonlilall'lene', san shi bich gonlilall'lene' lekzka' wzoe' le' ka'lə. <sup>23</sup> Na' shi ben' Israelka' gonlilall'gake'ne', na' yidee legake' sto shii lee yaga', la' Chioza' wak gone'n. <sup>24</sup> Na' le' bi nakle ben' Israel, wak inacho nakle ka xoz' yag olivo yixaa diika' bidee lee yag olivo wenna', la'kzi bi nakan dowalj xoziiin. ¿Alechlin diika' nak dowalj xoziiin ki yideen sto shii? Ben' Israelka' nakgake' ka xoziiin daa nak dowalj, na' aga bi lallj nakan yileb Chioza' legake' dii yoblə.

<sup>25</sup> Le' ben' bish' na' le' ben' zan', de to dii bin' inezile daa bzajinii Chioza' nad', na' cheenid' inezilen kwenche bi gakzle ben' cha'sib na' gakzile zak'chle ka neto' ben' Israel. La' aga toshiizin gak ben' Israelka' ben' widenag, san kat'ka' ba bza' ben'ka' bi nak ben' Israel gonlilall'gake' Cristonan', bich gak ben' Israelka' widenag. <sup>26</sup> Na' ka illin lla gak ka', na'ch yog' ben' Israelka' yiyakgake' lall' na' Chioza'. Na' gak ka na Cho'a Xtilleena' daa na:

Yell Jerusalénna' ichej to ben'

yisell yilee ben'ka' nak xiiñ dia che dii Jacoba' lao dii mala'.

<sup>27</sup> Na' dgan ch̄cheb' gon' ch̄egake',

yizi'xen' saaxya che'ka'.

<sup>28</sup> Na' daa bi bzenag ben' Israelka' dill' wen dill' kob che Crístona', bllaa Chioza' legake'. Na' daa gok ka' got' latj benlilall'lene', le' bi nakle ben' Israel. Per Chioza' ni chakile' neto' ben' Israel daa wleje' dii xoxcto'nto'ka' kwenche gakgake' ben' yell che'. <sup>29</sup> Na' daa chon Chioza', aga wikwase'n na' bi chiyajile' daa chax chnabe' cho'. <sup>30</sup> Kana', le' bi nakle ben' Israel, bi bzenagle che Chioza'. Per naa, daa gok ben' wlall cha'ka' ben' widenag lao Chioza', ba biyesh'lallile' le'. <sup>31</sup> Na' daa bi chzenaggake' che Chioza' naa, chak ka' kwenche wliyi Chioza' legake' nan lekzka' chiyesh'lallile' legake' ka chiyesh'lallile' le'. <sup>32</sup> La' Chioza' bi'e latj yog'lol ben' gokgake' ben' widenag kwenche yog'logake' yiyesh'lallile'.

<sup>33</sup> ;Dii xen inleeb nak yel' sin' na' yel' chajonii che Chioza'! ;Ni to kono chajonii daa nllie' bia' gak wa daa nllie' bia' gone'. <sup>34</sup> La' “ni to kono nezi daa chza'lall' Xancho Chioza', na' ni to kono gak wzajniile'ne' nakan chiyal' gone'. <sup>35</sup> Biga zoa ben' ba bi'e Chioza' dii naki che' kwenche gone' lez yigoo Chioza' wzon che'.” <sup>36</sup> La' len' bxe bsile' yog'lolte dii de na' bllie' bia' chongakan ka chaklallee, na' yog'lol dii de nakan che'. ;Le' chidolee koochone' balaan zejli kanil! Kan' nakan.

## 12

<sup>1</sup> Na' le' ben' bish' na' le' ben' zan', daa ba biyesh'lallii Chioza' cho', chat'yoid' le', li we' Chioza' do ka nakle naa mbanle kwenche gakle dowlj ben' wen ka chazlallee, la' kan' chiyal' we'la'ochone'. <sup>2</sup> Na' bi gonle txen diika' de lo yell-lioni, san li we' latj yikob Chioza' yichjlall'do'lena' kwenche yilla' yel' mban chelena'. Na' ka' gakbe'ile daa cheenile' gonle. Na' daa cheenile' goncho nakan dowlj dii wen, daa chazlallee.

<sup>3</sup> Daa nzoa Chioza' nad' gon' xshine'na', nia' le': Ni tole bi gakile ba nakle to ben' zakii. San li gakbe'i nak nakle lao Chioza' kon ka zej chaklene' le' chonlilall'lene'. <sup>4</sup> Ka nak che kwerp chechoni, dii zan dii nsa'n na' aga toz ka dii chongakan. <sup>5</sup> Ka'kzan cho', la'kzi nak zanchi, tozan nakcho daa nonlilall'cho Crístoná', na' ndil nllagcho ka ndil nllag diika' nsa' to kwerp.

<sup>6</sup> Chioza' ba bene' cho' wde wdeli daa gak goncho kon ka chazlallee gon to tocho. Daan, beena' naki che' chixje'ile' ben' daa che' Chioza'ne', chiyal' wxenilalleene' gaklene' le' gone'n. <sup>7</sup> Na' beena' naki che' gaklene' ben', chiyal' gone'n do yichj do lallee. Na' beena' naki che' wli' wsedile' ben' yoblə, chiyal' wli' wsedile' legake'. <sup>8</sup> Na' beena' naki che' wtipe' lall' ben', chiyal' wtipe' lall'gake'. Na' beena' naki che' izanile' bi wi'e ben', chiyal' wi'en do yichj do lallee. Na' beena' naki che' gak kwee xnezi dii chak che ben', chiyal' gone'n xochi ga zeelo gake'. Na' beena' naki che' yiyeshile' ben', chiyal' yibaile' gaklene' ben'.

<sup>9</sup> Li gaki ljwell-le do yichj do lall'le. Li gakzbani dii mala' na' li soa gonle dii wenna'. <sup>10</sup> Li gaki ljwell-le ka bish' goljle, na' ganga goni ljwell-le ka ben' zak'chi ka le'.

<sup>11</sup> Bi wshe'lall'le gonle daa cheeni Xanchona', san li gon ka dii le gonle daa chazlallee axt ga zeelo soile.

<sup>12</sup> Li yiba yizaki daa nonle lez lljazoalenle Chioza', li gap ye!' chxenlall' kat' zaak ye!' zak'zi'ka', na' li we'ljwill Chioza' toshiizi.

<sup>13</sup> Le' nakle lall' na' Chioza', li gaken ljwell-le shi bi dii chyalljile. Na' li we' ben' ga yigaangake' loo yoo lill-le.

<sup>14</sup> Chiyal' inabile Chioza' gak wen che ben'ka' chsak'zi' le'. Li inab gak wen chegake' na' bi chishjle bia' blag' chegake'.

<sup>15</sup> Li yiba yizakleni ben'ka' chiba chizaki na' li kwell-len ben'ka' chbell.

<sup>16</sup> Li soalen ljwell-le wen. Bi gake beṅ' cha'sib, san li gon txen beṅ' yesh'do'ka'. Na' bi gon kwınle ka to beṅ' sin'.

<sup>17</sup> Shi ga zoa beṅ' chone' mal chele, bi yizi'le wzonna'. Chiyal' sho' yichjle gonle wen lao yog' beṅ'. <sup>18</sup> Chiyal' gonle axt ga zeelo gake kwenche soalenle yog' beṅ' mbalaz. <sup>19</sup> Le' beṅ' bish' na' le' beṅ' zan', bi chiyal' yizi'le wzon che beṅ' shi bi chone' chele, san li gonan lo na' Chioza' kwenche le' wsak'zi'ene'. La' Cho'a Xtilleena' nan: “Xancho Chioza' ne': Nad' yizia' wzon che beṅ'ka' chon dii mala'. Na' nad' wsak'zi'gakee.” <sup>20</sup> Na' lekzka' nan: “Shi chbil chdon beena' chakzbani li', be' dii yeej gawe'. Na' daa gono' ka', yiyii yido'ile.” <sup>21</sup> Bi we'le latj inabia' dii mala' le', san li gon wen kwenche gonle gan dii mala'.

## 13

<sup>1</sup> Yog'cho chiyal' wzenagcho che beṅ'ka' chnabia', la' aga bi yel' wṅabia' de dii bi nak che Chioza'. Na' Chioza' nzoe' beṅ'ka' kwenche inabia'gake'. <sup>2</sup> Na' beena' chizoshi' beṅ'ka' chnabia', daa nllia Chioza' bia' gonchon chizoshi'e. Na' beṅ'ka' chon ka', choglo chegake' sak'zi'gake'. <sup>3</sup> Beṅ'ka' chnabia', aga zoagake' kwenche wwall wshebgake' beṅ'ka' chon wenan, san beṅ'ka' chon malan chiyal' gall illebgake' legake'. Shi chall chllebo' beṅ'ka' chnabia', ben wen, na' inegake' wen cho'. <sup>4</sup> La' Chioza' nzoe' beṅ'ka' chnabia' kwenche soacho mbalaz. Per shi bi chono' wen, na'chan sho' shebo', la' aga zoaxenzə beṅ'ka' chnabia'n, san Chiozan' nzoe' legake' kwenche wsak'zi'gake' ka chiyali beena' bi chon wen. <sup>5</sup> Daan, chonan byen wzenagcho che beṅ'ka' chnabia', aga kwenchezə bi wsak'zi'gake' chon', san daa nezicho chiyal' goncho wenan. <sup>6</sup> Na' lekzka' chiyal' we'cho daa chidol'cho

chixjcho, la' Chioza' nzoe' legake' kwenche chnabia' gake', na' lennan' noni xshingake'.

<sup>7</sup> Na' chiyal' yiyixjcho che yog' ben' shi bi chbag'cho chegake'. Shi chal'cho daa chchixj ben'ka' chnabia' cho', chiyal' chixjchon. Na' beena' chiyal' idap balaan, chiyal' gapchone' balaan. Na' beena' chido! sho'e balaan, chiyal' koochone' balaan. <sup>8</sup> Bi chiyal' ibag'cho che ben', san daa chiyal' goncho gaki ljwellcho, la' beena' ba chaki bish' ljwelle'na' ba chone' doxen ka na ley che Chioza'. <sup>9</sup> Na' ki na ley che'na': "Bi taleno' nool bi nak xoolo'. Bi gono' xya. Bi kwano'. Bi selalloo bi de che ben'." Yog'kza diikin ba choncho lente yog' diika' sto nllia leya' bia' shi ba choncho dga na: "Chiyal' gaki bish' ljwello'na' ka chaki kwino'." <sup>10</sup> Shi ba chakicho bish' ljwellchona', bibi dii mal gonichone'. Daan, ba choncho doxen ka nllia leya' bia' shi ba chaki ljwellcho.

<sup>11</sup> Li gakbe'i ka nak llaki zoacho naa. Ba gol' goncho ka dii le na' bich gonzcho ka ben' ches, la' gaoch ba zoa yisla Chioza' cho' lao dii mala' aga ka kana' zi' wyajle'cho cho'a xtilleena'. <sup>12</sup> Ba zoa gao te che yell-lioni gani chnabia' dii mala' daa zaklebi yel cho!a', na' ba zoa gao ile'icho beeni' che Chioza'. Daan, chiyal' kwej yichjcho dii mala' na' soacho goncho dii wenna' lega ben' yoo beeni' che Chioza'. <sup>13</sup> Chiyal' wsa' checho wen, ka ben' chda tella. Bi chiyal' goncho txen ga cheej chao ben' na' chzoll chnitgakile', ni bi chiyal' talencho xiin xool ben' wa xiin xyo ben', ni bi chiyal' goncho bichla daa nak zban. Na' bi chiyal' gakti-lencho ben', ni bi chiyal' gakcho ben' xe'. <sup>14</sup> San chiyal' gon kwinchcho lall' na' Xancho Jesucristona' na' koo yichjcho wsa' checho ka chazlallee na' bich secho wneyi we'cho cho'a xbayi beli chenni.



## 14

<sup>1</sup> Li gap yel' chxenlall' che beena' bin' gakcha, na' bi gakkil-lenlene' ni che diika' bi nak dii lialo. <sup>2</sup> La' bal ben' chakgakile' nakkzan wen gaogake' bittezə yel' wao, na' zi bale' chakgakile' chiyal' gaogake' shgal' yix' kwan. <sup>3</sup> Beena' cheej chao bittezə, bi chiyal' gonile' nakzi beena' bi cheej chao yog'lol. Na' beena' bi cheej chao yog'lol, bi chiyal' gakile' beena' cheej chao bittezə bi chone' wen. La' Chioza' ba noni xiine' choptegake'. <sup>4</sup> ŶNora nako' li' wwia wyizo' nak chon wen llin che ben' yoblə? Toz xane'nan' nezile' shi chone' wen wa bi chone' wen. Na' wzakkzile' gone' ka chiyal', la' Xanchona' nape' yel' wak kwenche gone' ka soachech xiine'ka' gongake' ka cheenile'.

<sup>5</sup> Na' nit' ben' chakgakile' zoa lla nakchan lla choo lla xench aga ka lla yoblə. Na' lekzka' zoa ben' chakgakile' toz ka nak yog'te llaka'. To to ben' chiyal' soe' do yichj do lallee gone' ka chakile' nakan wen. <sup>6</sup> Na' beena' chaki zoa lla nakan lla choo lla xench aga ka lla yoblə, chbeje'n kwenche kwee Xancho Crístona' balaan. Na' beena' chaki toz ka nak yog'te llaka', lekzka' Xancho Crístonan' chgwee balaan daa chakile' ka'. Na' beena' chao bittezə, chgwee Xanchona' balaan, la' cho'e Chioza' yel' choxken kat' chawe'n. Na' beena' bi chao yog'lol, lekzka' chgwee Xancho Crístona' balaan, la' lekzka' cho'e Chioza' yel' choxken kat' chawe'.

<sup>7</sup> Ni tocho bi chiyal' secho wneyi che kwinzcho. Shi mbancho wa shi guetcho chiyal' secho wneyi daa cheeni Crístona'. <sup>8</sup> Shi mbancho na' goncho ka sho' Xancho Jesucrístona' balaan, na' shi guetcho na' guetcho ka sho'e balaan. La', laa mbancho wa ba witcho, lall' na' Xanchona'kzan nakcho. <sup>9</sup> Crístona' wite' na' bibane' ladj ben' wetka' kwenche gake' Xan yog'lol ben', ka ben' mban na' ka ben' ba wit.

<sup>10</sup> Bi chiyal' yiya yiyiljcho bish' ljwellchona', ni bi chiyal' gonichone' nakzi. La' yog'lolcho lljazecho lao Chioza' kwenche wchogloe' che to tocho. <sup>11</sup> Cho'a Xtill' Chioza' nan:

Xancho Chioza' ne', dii li zoakz' nad', na' dii li yog' ben' wchek' xibe'ka' lawa'ni,  
na' yoguee we'gake' dill' nan nad' nak' Chios.

<sup>12</sup> Na'chan to tocho yidecho kwent lao Chioza' che diika' bencho.

<sup>13</sup> Daan, bich chiyal' yiya yiyilj ljwellcho. San wsak'cho bi goncho bittezə dii gonan ka ixop bish' ljwellchona' gone' dii mala' wa gakchoplallee. <sup>14</sup> Daa bzajni Xancho Jesúza' nad', nezid' aga bi yel' wao de dii chxinj chlenan cho', lete shi to ben' chakile' de yel' wao dii chxinj chlenan yichjall'do'ena', bi nakan wen gawe'n shi naa. <sup>15</sup> Na' shi daa cheej chawo' chonan ka chakchoplall' bish' ljwello'na', aga chakilo'nen' shi ni cheej chaozo'n. Bi chiyal' yeej gawo' daa gonan ka kwiayi' beena' wit Crístona' ni che'. <sup>16</sup> La'kzi chonle bittezə dii chakile nakan wen, bi chiyal' gonchlen shi chonan ka ina ben' yoblə aga wenan chonle. <sup>17</sup> La' shi ba chnabia' Chioza' cho', diika' cheej chaocho bi nakan dii llialo, san dii llialo yiyakcho ben' li ben' shao' na' soalen ljwellcho mbalaz, na' soacho yiba yizakicho daa zoalen Espíritu Sántona' cho'. <sup>18</sup> Na' shi zoacho choncho diiki chazlall' Crístona', na' yibayi Chioza' ka choncho na' lekzka' ben' yell-lioni inagake' choncho wen.

<sup>19</sup> Daan, chiyal' goncho to dii byen soalen ljwellcho mbalaz na' gakchachcho ganga. <sup>20</sup> Bi yeej gaocho to dii gonan ka yinit dii wenna' ba ben Chioza' checho. Dii li, yog' diika' cheej chaocho nakgakan wen, san bi nakan wen yeej gaocho to dii chonan ka gakchoplall' ben' yoblə. <sup>21</sup> Wentelan bi gaocho belaa ni bi yeejcho vinona', ni bi gonzcho bittezə dii gonan ka gakchoplall'

bish' l<sub>j</sub>wellchoka'. <sup>22</sup> Chiyal' inezilo' daa yeej gawo' do yichj do lalloo bi nakan mal lao Chioza'. Chakomba beena' bibi chza'lallee cheyi daa nezile' nak wen. <sup>23</sup> Beena' chonchoplall' kat' yeej gawe' to yel' wao, chape' dol' daa bi chawe'n do yichj do lallee. Na' yog' daa bi goncho do yichj do lall'cho, nakan xya.

## 15

<sup>1</sup> Na' cho' ba zoachechcho chonlilall'cho Chioza', chiyal' gapcho yel' chxenlall' che ben'ka' bin' gakcha, na' bi chiyal' gonzcho daa cheenzicho goncho. <sup>2</sup> To tocho chiyal' goncho dii gaklenen bish' l<sub>j</sub>wellchoka' kwenche gakchagake'. <sup>3</sup> La' Crístona' aga bene' daa wyazlall' to kwinze', san gok che' ka na Cho'a Xtill' Chioza', daa na: "Daa wchell wne ben' cho' bzoazi'yaagakan nad'." <sup>4</sup> Na' yog' diika' na Cho'a Xtill' Chioza' bzejgake'n kwenche wzajniin cho' na' wtipan lall'cho kwenche gapcho yel' chxenlall' lao diika' chen chle'icho na' goncho lez dii wenna' ba bcheb Chioza' checho. <sup>5</sup> Chioza', beena' chon cho' yel' chxenlall' na' chtipe' lall'cho, gaklenshgue' le' soalen l<sub>j</sub>well-le wen kon ka bli'yi Cristo Jesús'a cho', <sup>6</sup> kwenche yog'le gakle toz we'la'ole Chioza', beena' nak Xa Xancho Jesucrístona'.

<sup>7</sup> Daan, li wleb l<sub>j</sub>well-le, ka ben Crístona' blebe' le' bénlene' txen, kwenche koole Chioza' balaan. <sup>8</sup> Na' nia' le', Crístona' bide' kwenche gaklene' neto' ben' Israel, kon ka bcheb Chioza' lao dii xozxto'nto'ka' kwenche inezinto' chone' kon ka chchebe'. <sup>9</sup> Na' lekzka' bide' kwenche ben'ka' bi nak ben' Israel we'la'ogake'ne' daa chiyesh'lallile' legake'. Chak ka na Cho'a Xtill' Chioza' daa na:

Daan, we'lawa li' ladj ben'ka' bi nak ben' Israel,  
na' gol' inia' we'lawa li'.

<sup>10</sup> Na' gan yoblə chiznan:

Le' bi nakle ben' Israel, li yibaleni neto' naknto' yell che'.

<sup>11</sup> Na' ləkzka' gan yoblə chiznan:

Yog'le le' bi nakle beṅ Israel, li we'la'o Xancho Chioza'.

Le' lle'le yog'te yell, li gol inie'.

<sup>12</sup> Na' ləkzka' dii Isafaza' bzeje' daa na:

Ka to yag dii chigaa, ka' yiyak xiṅ dia che dii Isafána',

daa galj to beṅ inabi'e beṅ'ka' bi nak beṅ Israel,

na' gongake' lez gaklene' legake'.

<sup>13</sup> Chios, beena' noncho lez gone' wen checho, gonshgue' ka yibaile na' soale mbalaz daa nonlilall'lene, kwenche zizikli gonchlene' lez daa zoalen ye!' wak che Espíritu Sánto che'na' le'.

<sup>14</sup> Le' beṅ bish'dawaa na' le' beṅ zandawaa, nezyenid' le beṅ wen nakle na' le ba chajniile, na' ba chak wzajniiljwell-le.

<sup>15</sup> Na' lee yishi ba biyaxjid' bzej' le' che ba diika' bi chiyal' guetlall'le, la' chaklen Chioza' nad' kwenche

<sup>16</sup> chon' xshin Jesucrístona' ladj beṅ'ka' bi nak beṅ Israel.

Na' llinni chon' nakan ka xshin bxož, beena' chjwa' lao Chioza' diika' bibi nda' nchen. La' daa choe'len' legake' dill' wen dill' kob che'na' kwenche gonlilall'gake' Crístona', na' yixis yiyib Espíritu Sántona' yichjlall'do'eka', na' gaggake' lall' na' Chioza', wak inacho nakgake' ka to dii bibi nda' nchen daa chzanid' wi'ane'.

<sup>17</sup> Daa chaklen Cristo Jesús'a nad', chibaid' cho'a dill' chon' xshin Chioza' daa bene' lall' na'.

<sup>18</sup> Aga wiyaxjid' wi'a dill' che bichlə dii ba ben', san cho'a dill' ka ba bchin Crístona' nad' kwenche zan beṅ'ka' bi nak beṅ Israel chzenaggake' che'. Bchine' diika' wnia' na' diika' ben'

<sup>19</sup> kon ye!' wak che Espíritu che'na' kwenche gok diika' ben ble'i beṅ na' wyajle'gake'. Wzolož Jerusalénna' na' wya' axt doxen gana' mbani Ilíricon'a be'len' yog' beṅ dill' wen dill' kob che Crístona'. <sup>20</sup> Na' ben' byen jtixji'a dill' wen dill' kob che'na' gana' konon' inezin, kwenche

## Romanos 15:21    37    Romanos 15:32

bi jaçhish' ja<sub>l</sub>an' xshin be<sub>n</sub>' yoblə. <sup>21</sup> San kon ka na Cho'a Xtill' Chioza', gana' nan:

Be<sub>n</sub>'ka' bi<sub>n</sub>' gombia'gake' xtilleena', gombia'gake'n,  
na' be<sub>n</sub>'ka' bi<sub>n</sub>' yengakile' xtilleena', shajni'gakile'n.

<sup>22</sup> Na' ni che llin dga chon' bi<sub>n</sub>' gak yid' gana' zoale, la'kzi zan shii ba goklallaa yidwia' le'. <sup>23</sup> Per naa ba biyoll be<sub>n</sub>' xshin Chioza' doxen gani chda', na' chakid' wak yidwia' le', la' kana'te chaklallaa yid'. <sup>24</sup> Cheenid' tia' gana' zoale kat' sha' Espáñana', la' cheenid' ile'id' le', la'ch' shloll, kwenche soacho mbalaz. Na' chbez' gaklenle nad' kwenche gak kooch' nez. <sup>25</sup> Per naa, yiyaa Jerusalénna' lljasan' dii chyallji be<sub>n</sub>' bish'choka' lle' na'. <sup>26</sup> La' be<sub>n</sub>'ka' choe'la'ogake' Crístona' Macedóniana' na' Acáyani do yichj do lall'gake' ba btopgake' mech dii wsel'gake' che be<sub>n</sub>' yesh'do'ka' len ladj be<sub>n</sub>'ka' nonlilall' Crístona' Jerusalénna'. <sup>27</sup> Do yichj do lall'gake' chaklall'gake' gaklengake' legake', na' dii li nakan to dii chiyal' gongake', la' lengake' ba naki chegake' dii wenka' ba bcheb Chioza' che neto' be<sub>n</sub>' Israel, na' chiyal' yigoogake' wzon che be<sub>n</sub>' Israelka' we'gake' daa chyalljgakile'. <sup>28</sup> Na' ka yiyoll lljasan' mechi dga bengake' lo na', na' kwaa nez sha' Espáñana' na' tia' yidwia' le'. <sup>29</sup> Na' nezid' kat' yidwia' le', dii xen inleeb gaklen Crístona' cho'.

<sup>30</sup> Le' be<sub>n</sub>' bish' na' le' be<sub>n</sub>' zan', daa nonlilall'cho Xancho Jesucrístona' na' daa chon Espíritu Sántona' ka chaki ljwellcho, chat'yoid' le' gake nad' txen inabgachile Chioza' gaklene' nad' lawi diika' chdil' chllag'. <sup>31</sup> Li inabi Chioza' yisle' nad' lo na' be<sub>n</sub>'ka' bi chonlilall'gake' Crístona', be<sub>n</sub>'ka' lle' gana' mbani Judeana', na' lekzka' li inabile' sho'lall' bish' ljwellchoka' lle' Jerusalénna' dga lljasan' chegake', <sup>32</sup> kwenche zoa' mbalaz yidwia' le', shi Chioza' gone' latj, na' yiyakshao'lallaa daa soacho txen.

<sup>33</sup> Na' Chioza', beena' chon ka zoacho mbalaz, soalenshgue' yog'le. Ka' gakan.

## 16

<sup>1</sup> Cheenid' gombia'le ben' zanchona' le Febe, beena' zoa chaklene' bish' ljwellchoka' nonlilall' Jesucrístona' yell Cencreana'. <sup>2</sup> Daa nonlilallee Xancho Jesucrístona', wlebgachlene' do yichj do lall'le kat' yide' gana' zoale, la' kan' chiyal' goncho, cho' nakcho lall' na' Chioza'. Na' gaklenlene' shi bi dii chyalljile', la' len' ba goklene' zan bish' ljwellchoka' na' lentia' ba goklene'.

<sup>3</sup> Li wwapgach chiox Priscilana' len ben' che', Aquilana', ben'ka' chonlengake' nad' xshin Cristo Jesúsza'. <sup>4</sup> Legake' bzoa dii nxoll yel' mban che'ka' kwenche goklengake' nad'. Na' aga to nad'zan nia' choxkengake' bengake' ka', san len yog' ben'ka' bi nak ben' Israel, ben'ka' ba nonlilall' Crístona' to to yell gana' jtixji'a xtilleena'. <sup>5</sup> Na' lekzka' li wwapgach chiox ben'ka' chdop chllag choe'la'ogake' Crístona' lille'ka'. Na' wwapgachle chiox Epenétona', beena' le chakid', beena' gok ben' nech benlilallee Crístona' gana' mbani Ásiana'. <sup>6</sup> Li wwapgach Maríana' chiox, la' le ba bilal bizodile' kwenche goklene' le'. <sup>7</sup> Li wwapgach chiox ben' wlall cha'ka' Andróniconna' na' Júniaza', ben'ka' wyoolen' txen lillyana'. Nechgake' benlilall'gake' Crístona' ka nad', na' mbejlaogake' ladj ben'ka' chjtixjee xtilleena'.

<sup>8</sup> Li wwapgach chiox Ámpliaza'. Le chakidee daa nake' Xancho Jesucrístona' txen. <sup>9</sup> Li wwapgach chiox Urbánona', beena' chonlene' neto' xshin Cristo Jesúsza', na' Estáquiza', beena' le chakid'. <sup>10</sup> Li wwapgach chiox Apéleza', beena' ba bli'e chakile' Crístona' do yichj do lallee. Na' li wwapgach chiox Aristóbulona' na' ben'ka' nake' txen loo yoo lille'na'. <sup>11</sup> Li wwapgach chiox

Herodiónna', beena' nak ben' wlall cha'. Na' lekzka' li wwapgach chiox Narcísona' na' ben'ka' nake' txen loo yoo lille'na', ben'ka' nonlilall' Xancho Jesucrístona'.<sup>12</sup> Li wwapgach chiox Trifénana' na' Trifósana', noolka' chon xshin Xancho Jesucrístona'. Na' li wwapgach chiox Pérsidana', beena' le chakicho, la' le ba bilalile' bene' xshin Xanchona'.<sup>13</sup> Li wwapgach chiox Rúfona' beena' le zoacheche' chonlilallee Xancho Jesucrístona', na' lekzka' xneena', beena' chonile' nad' ka xiine'.<sup>14</sup> Li wwapgach chiox Asíncritona', Flegóntena', Hérmeza', Patróbaza', Hérmeza' na' ben' bish'choka' na' ben' zanchoka' zoalen legake'.<sup>15</sup> Li wwapgach chiox Filólogona' na' Júliana', na' Nerewa' len ben' zane'na', na' Olímpaza' na' yog' ben'ka' zoalen legake', ben'ka' nak lall' na' Chioza'.

<sup>16</sup> Li wwapgach chiox ljwell-le lega ben' chaki ljwellin daa nakle Chioza' txen. Yog' ben'ka' nonlilall' Crístona' yellka' gana' ba wya' chwapgake' le' chiox.

<sup>17</sup> Le' ben' bish' na' le' ben' zan', li wsak' bi wzenagle che ben'ka' chon ka chak ben' choplə, na' gongake' ka gakklejile che dill' lina' ba nsedle. Bi gonle legake' txen.<sup>18</sup> Ben'ka' chon ka' aga chongake' ka cheeni Xancho Jesucrístona', san chongake' daa nazan chegake'. Na' choe'la'o choe' dill'gake' na' choe'gake' dill' gollall' kwenche chonllej chongangakile' ben'ka' chajle'daz.<sup>19</sup> Yog'te ben' ba nezgakile' nakle ben' wizoa dill', na' le chiba chizakid' ka chonle. Na' cheenid' gakle ben' sin' kwenche gonchle diika' nak wen na' bibi dii mal gonle.<sup>20</sup> Na' Chioza', beena' chon ka soacho mbalaz, lii wlliyi'tie' ye! wak che Satanáza' na' gone' ka wlej wshoshjlen. Xancho Jesucrístona' gaklenshgue' le'.

<sup>21</sup> Timotewi, beeni chonlene' nad' xshin Chioza', chwape' le' chiox na' lekzka' Lúcioni, Jasónni na' Sosípa-teri, ben'ki nak ben' wlall cha'.

<sup>22</sup> Nad', Tercio, chzej' dga na Pábloni, na' lēzkza' chwap' le' chiox daa nakcho Xancho Jesucrístona' txen.

<sup>23</sup> Na' Gáyoni chwape' le' chiox, beeni none' lille'ni zoanto', na' lēzkza' lille'ni no'en kwenche chdop chllag ben'ki choe'la'ogake' Crístona'. Na' Erástoni, beeni ngoo lo nee mech che yelli, chwape' le' chiox, na' lēzkza' bish' ljwellchoni le Cuarto.

<sup>24</sup> Xancho Jesucrístona' gaklenshgue' yog'lo!tele. Kan' gakan.

<sup>25</sup> Chiyal' we'la'ocho Chioza', beena' wak gone' ka soachechle gonlilall'lene' daa wyajle'le dill' wen dill' kob che'na' daa chyixji'a, daa chzajniin cho' che Jesucrístona'. Nakan daa kono wnezi kani'teyi, <sup>26</sup> per naa, Chios, beena' zoa zejli kani, chaklallee inezichon, na' ba bene' ka chajniicho diika' bzej dii ben'ka' wdixjee daa golle' legake' kani'yi kwenche yog' ben' lle' doxen yell-lioni shajle'gake'n na' wzenaggake' cheyin.

<sup>27</sup> Toz Chioza' zeelo nake' ben' sin'. Na' chiyal' koochone' balaan zejli kani daa bselee Jesucrístona'. Kan' nakan.



## Dill' wen dill' Kob Che Jesucristona'

New Testament in Zapotec, Cajonos (MX:zad:Zapotec, Cajonos)

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

### Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

